

# مرقوس

خبر يڭ بائيك هق توهن بري مرقوس  
رويت چارا حال عيسى المسيح

نبي يحيى هق تيمبول ماري دولو فد عيسى

ب 1

- 1 اينيله خبر يڭ بائيك چارا حال عيسى المسيح، انق توهن.
- 2 خبر يڭ بائيك ني تيمبول ماري سروف هق نبي يعشيا كارغ دولو كات:

فرهاتيله! اينيله فسوروه كو، توهن كات. اكو نق سوروه  
بي كي دولو فد مو، سيمفن جالن انتوق مو.  
اورغ تو دوق سرو دلاوت فاسير كات: سيمفنه جالن  
انتوق ربّي! بائيكي بري بتول جالن دي نق لالو! \*

3

- 4 ايكوت ايات توله، يحيى ماري دوق سرو دلاوت فاسير، سوروه اورغ كات: مو كئا توبتله، تريما روكون مندي بفتيزما، انتوق نق بري توهن امفون دوسا ۲ مو!
- 5 فس سموا اورغ دنكري يهوديه دان كوت جروسليم فون فاكت كي بلاك دسيتو، نق دغر هق يحيى دوق رويت تو. فواق تو مفاكو دوسا ۲ دي، فس يحيى بري دي تريما روكون مندي بفتيزما دالم سوغي يردن.
- 6 فكاين يحيى بوات دغن بولو اونتا، فس تالي كنديت دي بوات

- دغن کوليت. مکانن دي بلالغ دغن مانيسن مادو.
- 7 فس، دي برشرح کات: اد سئورغ هق ماري کديان فد اکو. دي فريغکت تيغکي فد اکو لاگي، اکو تاء فادن نق جاي همب هق کرج تندوق نق چابوت کاسوت دي فون.
- 8 اکو بري مو تريما روکون مندي دغن اير. تافي دي نق بري مو تريما هق موليق فد روکون تو لاگي، ياءيت نق تورون روح توهن اتس مو.

### عيسي تريما روکون مندي بفتيزما

- 9 لفس فد تو، عيسي ماري درفد کمغوغ نصره، دنکري کاليل، فس يحييا بري دي تريما روکون مندي دالم سوغي يرن.
- 10 تکه عيسي تيمبول فد اير تو، دي نمفق لاغيت تريوک، فس روح توهن تورون اتس دي سروف بوروغ مرفاتي.
- 11 فس بوپي سوارا دلاغيت کات: موله انق کو هق کاسيه سوغکوه. اکو برکنن کفد مو!
- 12 لفس فد تو، روح توهن بري عيسي کي سلالو کالاءوت فاسير،
- 13 کاتمفت تاء اد اورغ. عيسي دوق دسيتو امفت فولوه هاري، فس هييليس ماري چوب دي. بناتغ ۲ بيغکيغ فون اد جوک دسيتو، تافي ملائیکه ۲ دوق تولوغ عيسي.

### عيسي سوروه اورغ کالاءوت توروت دي

- 14 لفس فد يحييا کنا ايکت ده، عيسي کي کانکري کاليل، نق برشرح خبريغ بآيک، هق ماري درفد توهن، کات بالس ني:
- 15 سمفي ماس ده هق توهن نق امبيق فرينته دي دالم هاتي مائسي! توبتله دوسا ۲ مو، فالينغ ماري فرچاي خبريغ بآيک ني!
- 16 تکه عيسي دوق برجالن دتغي لاءوت کاليل، دي نمفق اورغ کالاءوت دوا اورغ، صيمون دغن ادیق دي اندرياس، دوق چمفق

- جالا ايكن دالم لاءوت.
- 17 عيسى فون اجق دي كات: ماريله توروت اكو كي، فس اكو نق اجر بري مو فندي چاري مائسي، سروف مو چاري ايكن ني!
- 18 دوا براديق تو فون سلالو تيغگل جالا دي، توروت عيسى كي.
- 19 فس عيسى برجالن كي سيكيت لاكي، دي تمو دغن دوا براديق فول نلم يعقوب دغن يحيا، ياءيت انق ۲ زبدي.
- دي دوق سيمفن فوكت دالم فراهو دي.
- 20 با نمفق دوا براديق تو، عيسى فغگيل دي ماري. دي فون تيغگل چي، دي زبدي تو دغن اورغ ماكن كا جي دالم فراهو فس توروت عيسى كي.

### اورغ هق ماسوق هنتو

- 21 فواق تو فون كي سمفي كا كمفوغ كفرناحوم. بيلا سمفي هاري ميغگو، هق اورغ يهودي لارغ تاء بري بوات كرج، عيسى ماسوق دالم مسجد اورغ يهودي، فس دي مغاجر دسييتو.
- 22 اورغ ۲ هق دوق دغر، براس حيران فعاجران عيسى، كران عيسى مغاجر دغن كواس، تاء سروف دغن كورو۲ تورات.
- 23 تكه تو، اد ساتو اورغ دوق دالم مسجد هق ماسوق هنتو.
- 24 دي برجريت، بلغ ۲ كات: هي عيسى، اورغ نصره! مو ماري بلاء اف كا تمغت اكوني؟ مو ماري نق خيانه فواق اكو كه؟ اكو تاهو مو جادي سياف. مو جاني فسوروه هق توهن لتق انتوق بوات كرج دي!
- 25 عيسى فون سوروه هنتو تو كات: سېفله! مو توبيتله دالم
- 26 توبوه اورغ تو! هنتو فون كوچق درس اورغ تو، فس دي برجريت فول. بلغ ۲ برجريت، توبيت دالم توبوه اورغ تو.
- 27 فواق هق دوق سېيتو فون فاكت ترگا كيت، فس كيچيق سام دي كات: ويه! گن گيتو؟ دي مغاجر فيشين بارو كه؟ اورغ ني

28 اد کواس بوليه سوروه هنتو، هنتو فون گنا توروټ سوروهن دي. بالس توله، خبر چارا حال عيسي، ملارت کي سرات نکري گاليل تو.

### عيسي بري سيار بايق اورغ

29 فواق عيسي فون تيغگل مسجد اورغ يهوي دسيتو، کي تروس کا رومه صيمون دغن اندرياس. يعقوب دغن يحيا فون، کي سکالي دغن يي جوگ.

30 فس، توء منتوا صيمون تغه دوق تيدور، يي دم. با عيسي سمفي، اورغ درومه ماري رويت کا يي سلالو.

31 عيسي فون کي کا تمفت توء توا صيمون فس، فکغ تاغن يي اغکيت بري باغون. دم يي فون هيلغ، فس يي امبيق مکانن، بري کا فواق عيسي تو.

32 سبله فتغ تو، لفس فد متهازي جاتوه، اورغ باوا ماري کا تمفت عيسي، سمو اورغ هق اد فپاکيت، سکالي دغن اورغ هق

33 ماسوق هنتو. سمو اورغ هق اد دالم کمفوغ تو فون، فاکت ماري برهيمفون دافن رومه تو بلاک،

34 فس، عيسي بري هيلغ بايق اورغ هق اد فپاکيت بغسا مان ۲ فون، فس همبت بري توبيت هنتو، داورغ ماسوق هنتو.

عيسي لارغ تاء بري هنتو تو رويت اف سکارا، سبب هنتو تو تاهو کات عيسي جايي اورغ فريغت مان.

### عيسي کي برشرح دنگري گاليل

35 فس ايسوق فاکي فول، بلوم فد ماسوق صبح لاکي، عيسي باغون تيدور تيغگل رومه تو، توبيت فد کمفوغ، کي کا تمفت

سوڀي، نق برعا.

36 لفس فد عيسي کي تو، صيمون دغن ساين ۲ يي فون، باغون

- 37 فاکت کي چاري عيسی . بيلا تمو ده ، دي کات : سمو اورغ کي چاري توان گورو !
- 38 تافي عيسی جواب کات : کيت مستي کنا برجالن کي لاکي ، کا سمو کمفوغ دالم کليواسن ني . اکو مستي کنا سرو خبريغ بآيک کران سابيت توله اکو ماري سيني .
- 39 بالس توله ، عيسی کي زياره سرات نکري گاليل ، کي برشرح دالم مسجد ۲ اورغ ييهوي ، فس همت بري توبيت هنتو ۲ کاتيغ .

### عيسی دغن سئورغ فپاکيت بادم

- 40 لفس فد تو فول ، اد اورغ فپاکيت بادم ماري سجود کا عيسی مينتاء تولوغ دغن دي کات : يا توان ، کالو توان پراس کسياغ بلس کا امب ، توان اد کواس بري توبوه کو سيار ليچين هابيس فپاکيت ني !
- 41 عيسی کسياغ بلس سوغکوه ، فس دي هولور تاغن جامه اورغ تو کات : تنتو اکو نق تولوغ مو . جادي چوچيله توبوه مو !
- 42 فپاکيت دي فون هيلغ سلالو ، فس کوليت دي ليچين هابيس .
- 43 فس عيسی فسن کا دي دغن کرس سيکيت ، کات :
- 44 جاگاله هاوغ ! مو جاغن بري تاهو کا سياف دي ديه ، فرکارا ني . تافي موگيله سلالو کا تمغت املم ، بري دي فيقست توبوه مو . لفس تو ، کي سمبه قربان ، ايکوت هق نبي موسی سوروه ، جاني تندا کا سمو اورغ کات مو سيار چوچي ده .
- 45 تافي اورغ تو کي دوق رويت کا اورغ رات ۲ ، بايق ساغت ، هيغف سمفي عيسی تاء ليه کي ماسوق دالم کدي ملن ۲ فون . تافي دي دوق رتمغت تاء اد اورغ ، فس اورغ رات ۲ ماري کا تمغت عيسی دودوق تو .

## عيسى بري سيار اورغ تيفوق

## باب 2

- 1 تاء براف هاري لاكي، عيسى كليق كا كمفوغ كفرناحوم، فس بايق اورغ بويي خبر كات عيسى كليق ده، دوق اد درومه.
- 2 فس اورغ ماري برهيمفون بايق بدعه هيغك سمغي برسسق ترق تاء ار تمفت نق برديري اتوا ماسوق دافن فينتو فون. فس، عيسى دوق رويت خبر يڭ باءيك كا سموا فواق تو.
- 3 تكه تو، ار امفت اورغ اوسوغ اورغ تيفوق ماري كا تمفت عيسى.
- 4 تافي، سبب اورغ دوق برسسق ۲ دسيتو تو، دي نق ماسوق دكت عيسى تاء ليه. سابت تو دي ناءيك اتس سوتوه، تبوق لوبغ بتول دغن تمفت عيسى دودوق دباوه. بيلا دي تبوق ده، لوبغ تو، دي فون هولور اورغ تيفوق دغن ۲ فغوسوغ، تورون ماري دافن عيسى.
- 5 عيسى تاهو كات فواق تو فرچاي سوغكوه كا دي. دي فون رويت كا اورغ تيفوق تو: هي هاوغ، دوسا۲ مو سوده امفون ده!
- 6 تافي دسيتو، ار گورو۲ كتاب ثورات، هق دوق فيكير دالم هاتي دي كات: باءاف دي براني كيچيقي هينا كا توهن بالس تو؟
- 7 تاء ار اورغ بوليه امفون دوسا، ملاينكن توهن ساج!
- 8 دي دوق فيكير بالس تو، عيسى تاهو سلالو، فس كات كا دي: باءاف مو دوق فيكير بالس تو؟
- 9 اكو نق تان فواق مو، هق مان موده كات كا اورغ تيفوق ني؟ نق كات: دوسا۲ مو سوده امفون ده، اتوا نق كات: باغونله، امبيق فغوسوغ مو، برجالن كليق؟
- 10 تافي اكو نق بري مو تيفوق تندا كات، اكو مائنسي هق ماري دشرگ ني، ار كواس دنيا بوليه امفون دوسا مائنسي،
- 11 عيسى كات. فس دي فاليغ. كا اورغ تيفوق كات: اكو نق سوروه

12 مو، باغونله، اغكيت فغوسوغ مو باوا<sup>۱</sup> كليق كا رومه!  
تغه فواق تو سموا دوق تيغوق، اورغ تيغوق فون باغون،  
امبيق فغوسوغ دي چالن كي گادوه<sup>۲</sup>. فواق تو فون تركاكيت.  
دي براس نق فوجي توهن، فس دي كات: ايه! كيت تاء بياس  
تيغوق فركارا سروف ني!

### عيسى اجق ليوي توروت دي

13 لفس فد تو عيسى كي سكاللي لاکي كا فنتي، دتغي لاءوت  
کاليل. اد بايق اورغ ماري كا تمفت عيسى، فس دي مغاجر  
سموا فواق تو.

14 فس، تغه<sup>۲</sup> عيسى دوق برجالن کو<sup>۳</sup> تو، دي نمفق سئورغ نام  
ليوي بين الفیوس، دودوق کرج دتمفت اورغ کنا برادو باير  
چوڪي. عيسى کات کا دي: ماريله توروت اکو کي! ليوي فون  
باغون توروت عيسى کي سلالو.

15 لفس فد توفول عيسى دوق ماکن جاموان د رومه ليوي. دالم  
فواق هق دوق ماکن سكاللي دغن عيسى، فس دغن مريد<sup>۴</sup>  
دي تو، اد بايق اورغ هق کرج کوتيف چوڪي، دغن اورغ هق  
کنا هينا داورغ کمفوغ. دالم فواق<sup>۲</sup> تو، اد بايق اورغ  
هق توروت عيسى.

16 فس اد سفواق کورو<sup>۵</sup> تورات دالم قوم فريسي، نمفق عيسى  
دوق ماکن سكاللي دغن اورغ کوتيف چوڪي، دغن اورغ هق کنا  
هينا تو. فواق کورو تو فون کي تان مريد<sup>۲</sup> عيسى کات:  
باء اف توان مو سوک ماکن سكاللي دغن اورغ هق کيت هينا  
سروف اورغ کوتيف چوڪي تو؟

17 عيسى دغر هق فواق تو تان، فس دي جواب: بوکن اورغ  
سکر هق نق چاري بومور، نق! تافي اورغ ساکيت. اکو ماري  
ني، بوکن نق اجق اورغ هاتي بتول، تافي نق اجق اورغ هق

ساله بري دي فالينغ توروت اكو.

### اورغ ماري تان چارا حال فواس

- 18 فد ساتوماس، مريد ۲ يحيا هق اورغ گلر فغكيل: دي هق بري تريما روكون مندي بفتيزما تو، دغن اورغ قوم فريسي سائي، دوق فواس. فس اد اورغ ماري تان عيسي کات: يا توان، باء اف انق ۲ مريد يحيا دغن مريد ۲ قوم فريسي دوق فواس، تافي انق ۲ مريد توان سنديري، دق؟
- 19 عيسي فون جواب دغن عبارة کات: تکه اورغ دوق سوک د رومه بوات فولوت، اد کادق اورغ هق دوق براء ود ؟ تنتو تاء اد! تکه انق ترونا دوق اد سکالي دغن دي تاء براء ود.
- 20 تافي نق سمفي ماس ده، اورغ نق امبيق انق ترونا تو، باواء کي کا تمفت لائين. فد هاري تو، تنتو سائين ۲ دي نق براء ود.
- 21 فس، عيسي رويت عبارة سا لاگي، کات: تاء اد سياف هق فاکي کائين بوروق کي تمفوغ کائين بارو. کران تنتوله کائين هق تمفوغ تو نق تاريخ بري کهور لواس، کائين هق بوروق تو.
- 22 فس، تاء اد سياف هق امبيق اير بواه جابيت هق بارو بوات، کي بوبوه دالم بکس کوليت هق فاکي لام، کرس ده. تاکوت اير بواه جابيت تو نق بري فچه بکس کوليت تو، فس کدواش تاء ليه فاکي. دق! اير جابيت هق بارو، کنا بوه بکس هق بارو جوک!

### اورغ ماري تان چارا حال حکوم هاري ميغکو

- 23 فد ساتو هاري، هاري ميغکو، هق اورغ يهودي لارغ تاء بري بوات کرج، عيسي دغن انق ۲ مريد دي، دوق برجالن اتس باتس بندغ کندوم. تغه دوق برجالن تو، انق مريد دي کتوس کندوم ستغکي ۲ هق ماسق تو، نق ماکن.



- 24 فس، اورغ دالم قوم فریسی ماری رویت کا عیسی: تیغوقله! انق ۲  
مريد مو دوق کتوس تو، يي لڳر حکوم تورات کیت هق لارغ،  
تاء بري بوات کرج فد هاري میڳو!
- 25 تافي عیسی جواب: مو تاء بیاس باچاکه، ایات ۲ چارا حال نبي  
دءود، تکه يي دغن انق تاغن يي دوق لافر، بالس مان يي  
26 بوات؟ يي ماسوق دالم تمفت بوات عمل کا توهن، کي ماکن  
روتی هق اورغ سمبه ده کا توهن. هق تو جاني ده تکه ابياثر  
جادي امام بسر. ایکوت حکوم تورات کیت، امام ۲ ساج، هق  
بولیه ماکن روتی تو. تافي نبي دءود ماکن روتی تو، فس  
لییه لاکي، بري کا انق تاغن يي ماکن جوگ.
- 27 فس عیسی بري سود هق يي رویت تو کات: توهن لتق هاري  
میڳو انتوق بري باءیک کا مائسي، بوکن کات توهن جاديکن  
مائسي انتوق کنا توروت حکوم هاري میڳو تو.
- 28 بالس تو جوگ اکو مائسي هق ماری شرک ني، اد کواس  
بولیه فرینته اتس هاري میڳو تو جوگ

### اورغ هق تاغن ماتي سبله

### باب 3

- 1 لفس فد تو، عیسی کي فول کا مسجد اورغ يیهودي.
- 2 دسیتو اد اورغ هق ماتي تاغن سبله. فس اد سفواق دالم  
مسجد تو، نق تودوه عیسی کات يي بوات ساله. سابیت تو  
يي دوق فرهاتي تیغوق دغن هالوس هالوسي، نق تاهو کات  
عیسی بوات کا دق، بري اورغ تو هیلغ، فد هاري میڳو.
- 3 عیسی فون سوروه اورغ هق ماتي تاغن تو، کات: ماريله دوق  
دافن!
- 4 فس عیسی تان سموا اورغ تو: هق مان توروت حکوم تورات  
سوڳوه انتوق هاري میڳو؟ کیت نق بوات هق مولیق اتوا نق  
بوات هق هودوه کا اورغ؟ نق بري سلامت اتوا نق بونوه اورغ؟

- تافي دالم رامې ۲ تو، تاء ار سياف جواب، سئورغ هابوق .
- 5 عيسى دوق تيشوق كا اورغ رامې ساءني، فس دي براس موريه  
تافي هاتي دي كسياغ بلس كا فواق تو جوگ، كران دي كرس  
فروت، تاء تاهو دي ساله. عيسى فون سوروه اورغ هق ماتي  
تاغن ساءني كات: هولورله تاغن مو كوئ ني! اورغ تو فون هولور  
تاغن دي، كاكه سلالو.
- 6 بيلا دي تيشوق ده، اورغ قوم فريسي فون تيغگل مسجد سلالو  
كي مشورة دغن اورغ قوم راج هيرو، فاكث چاري جالن نق  
بونوه عيسى .

### اورغ رامې دوق دتفي لاءوت

- 7 لفس فد تو، عيسى دغن انق ۲ مريد دي، كي كا كليواسن  
لاءوت كاليل. فس اورغ رامې توروت دي جوگ. اورغ رامې تو ار  
هق ماري دنكري كاليل، ار هق ماري دنكري يهوديه، ار هق  
8 ماري دكوت جروسليم، ار هق ماري دكليواسن باليق سان سوغي  
يردن، فس ار جوگ هق ماري دتفي بندر صور دغن بندر  
صيدون. سموا اورغ رامې تو ماري تمغت عيسى بلاك، كران دي  
نغر چارا حال هق عيسى بوات .
- 9 اورغ رامې بايق كيتو لالو، سهيغت عيسى سوروه انق ۲ مريد  
دي سيمغن فراهو، بري دي بوليه دودوق، كران تائسير بري  
10 اورغ رامې تو هيمنيت دي، سبب عيسى بري هيلغ ده بايق  
اورغ هق ساكيت، دولو. سابيت تو، لاني سموا هق ساكيت  
دوق تينديه نق جامه دي .
- 11 فس اورغ هق ماسوق هنتو، افبيل دي تيشوق عيسى، سجدو  
دافن دي، فس برجريريت كات: موله انق توهن!
- 12 عيسى فون لارغ هنتو تو دغن كجف كات: مو جاغن رويت  
كا سياف ۲ كات اكوني انق توهن!

### عيسى فيليه صحابة دوا بلس اورغ

- 13 لفس تو، عيسى ناءيك اتس بوكيت، سكالې نغن اورغ هق دي ابق، ايڪوت كهندق دي.
- 14 فس، عيسى فيليه دوا بلس اورغ دالم فواق تو، هق دي فڱكيل صحابة هق باوا تيته دي. عيسى كات: اكو فيليه ده فواق مو، نق بري دوق سكالې نغن اكو. اكو نق هنتر فواق مو، سوروه
- 15 كي رويت خبر ناءيك چارا حال توهن. فس اكو نق بري مو باوا تيته كو، نق بري اد كواس بوليه همت هنتو شيطان توبيت داورغ.
- 16 اينيله نام دوا بلس اورغ هق دي فيليه: صيمون هق عيسى گلر فيتروس، يعقوب نغن ادق دي يحيا، كدوا تو انق زېدي.
- 17 فس عيسى گلر فڱكيل دي بوانرگيس، معنائ سروف كيت ميمبر، اندرياس، فيليف، برتولومي، متيوس، تومس، يعقوب انق
- 18 الفوس، تاديوس، صيمون سئورغ دالم قوم فڱغ بغسا يهودي تو،
- 19 فس يودس اسكريوت، اورغ هق نق درهاك كا عيسى ماس دافن.

### عيسى نغن كفلا هيليس نام بعيل زبول

- 20-21 لفس تو، عيسى كليق كا رومه، فس اورغ رامي ماري برهيمفون سكالې لاكي، هيڱك سمفي عيسى نغن صحابة ۲ دي ناءان نق ماكن. بيلا سفوفو سفويغ عيسى نغر حال ايت دي فون نق كي امبيق عيسى بوات لاري، كران دي كات عيسى بوات هق ناءان مناسابه.
- 22 فس، اد سفواق گورو تورات، هق ماري دكوت جروسليم، هق كات: ايش! عيسى ماسوق كفلا شيطان نام بعيل زبول تو!
- 23 تنتو نغن كواس ديهاله، عيسى ني بوليه همت هنتو توبيت. عيسى فون فڱكيل اورغ رامي ماري كا تمفت دي، فس دي فاكې

- عبارة کات: بالس مان هيبليس بوليه همبت هيبليس توبيت ؟  
 24 کالو ساتو نکري فچه بله جاي فواق ۲ هق لاون سام سنديري  
 تنتو نکري تو تاهن لام .
- 25 فس اورغ دالم سبواه رومه فون ، کالو ري مچه جاي فواق ۲ ،  
 باله سام سنديري ، تنتو کلورگ تو تاهن لام جوگ .
- 26 بالس تو جوگ ، عيسى کات ، کالو فواق هق هيبليس دوق  
 مريسته تو ، مچه جاي فواق ۲ ، فس لاون سام سنديري ، تنتو  
 تاهن لام ، نق جاي هافوس هيلغ هابيس .
- 27 فس ميسل لاگي ، تاهن ار سئورغ نق ماسوق سامون رومه اورغ کاگه  
 ملاينکن کرجوغ توان رومه تو دولو ، باروله بوليه رمفس هرت  
 بندا ري .
- 28 ايغتله ، عيسى کات ، دوسا مان ۲ فون هق مائسي بوات ، اتوا  
 هق ري کيچيق هودوه ۲ فون ، توهن بوليه امفون کا ري جوگ ،
- 29 تافي کالو سياف بوليه تيغوق کرج توهن ، فس کيچيق  
 هيئا چارا حال روح توهن تو ، اورغ تو توهن تاهن ليه امفون  
 سممور ، کران دوسا تو دوق ککل دالم هاتي ري .
- 30 عيسى کات بالس تو ، کران ار اورغ هق کات عيسى فاکي کواس  
 هنتو .

---

مق دغن ادیق ۲ عيسى

---

- 31-32 لفس تو ، مق دغن ادیق ۲ عيسى سمفي دوق دافن رومه ،  
 سوروه اورغ کي رويت کا عيسى ، کات ري دوق ننتي لوار ، نق  
 کيچيق . دالم رومه تو ، اورغ رامي دوق ليغکوغ عيسى . ري کات  
 کا عيسى : هي توان ! مق دغن ادیق ۲ توان دوق ننتي دلوار نق  
 کيچيق .
- 33 عيسى کات: سياف ري هق جاي مق کو ، هق جاي ادیق ۲
- 34 کو؟ ري فون فالیغ تيغوق کا اورغ هق دوق کلیلیغ ري تو فس

35 بي کات: فواق نيله هق کنا دغن اکو، سروف مق دغن ادیق. اورغ مان ۲ هق بوات ايکوت کهندق توهن، دپاله ادیق ۲ کو، جنتن بتينا، اتوا فون مق کو، عیسی کات.

### عبارة اورغ مبابور

### باب 4

- 1 فد ساتو هاري فول، عیسی مفاجر سکالي لاڳي، دتغي لاءوت کاليل. اورغ رامي بايق کيتو لالو ليڳکوڻ عیسی هيڻگ سمفي دي کنا ناءیک فراهو، نق دودوق. فراهو تو هوندور سيکيت فد تغي فنتي، فس اورغ رامي دودوق دتغي فنتي تو.
- 2 عیسی فاڳي عبارة ۲ نق اجر بايق فرکارا کا اورغ ۲ تو. تکه دي دوق مفاجر بي کات: دغرله! اد سئورغ کي تابور بنيه فاني.
- 3 بلغ ۲ بي دوق تابور تو، اد بنيه هق جاتوه تغه جالن، فس تو، ماکن دبورغ هابيس.
- 5 فس اد هق جاتوه اتس تانه، هق اد باتو باليق باوه. بنيه هق جاتوه سييتو فون، تومبوه ناءیک باغت، کران تانه باليق تو تاءالم. تافي لفس تو، متهاري فانس تريق، تونس ۲ بنيه تو کريغ، کران اکر نق تورون تاءليه.
- 7 فس اد فول، بنيه هق جاتوه دالم دوري. دوري ۲ تو فون تومبوه ناءیک، کاروت تونس، نق توبيت بواه تاءليه.
- 8 تافي اد جوگ هق جاتوه دتانه سجوق. بنيه تو فون، تومبوه ناءیک، توبيت بواه موليق. اد هق بوه سبوتير، برانق تيک فولوه کالي گندا. اد هق برانق انم فولوه کالي گندا. فس اد هق برانق سراتوس کالي گندا.
- 9 فواق مو هق اد تليغا، دغرله هق اکو رويت ده! عیسی کات.

### اد سبب عیسی فاڳي عبارة

- 10 لفس فد تو، تکه عیسی دوق سئورغ، اورغ هق دغر فمفاجران

- 11 ڊي ساءِني، ماري سڪالي دغن صحابة ۲ دوا بلس اورغ تو، سوروه عيسى هوري عبارة هق ڊي فاکي ساءِني تو. عيسى فون رویت: توهن بري ده کا فواق مو، بوليه ارتي رهسيا چارا حال فرينته ڊي اتس دنيا. تافي اورغ لائين هق دوق لوار فد مو، کنا تريما فغاجران کو ني دغن عبارة.
- 12 نق بري برلاک دغن ايات دالم کتاب هق کات:

ڊي بوليه تيغوق، ڊي نق تيغوق، تافي مات هاتي ڊي تاءِ نمفق. ڊي بوليه دغر، ڊي نق دغر، تافي ڊي تاءِ ارتي! کران کالو ڊي بوليه نمفق، بوليه ارتي، ڊي نق فالبيغ کليق کا توهن، توهن فون نق امفون دوسا ۲ ڊي.

#### عيسى هوري عبارة اورغ منابور

- 13 لفس تو عيسى تان فواق تو کات: مو تاءِ ارتي لاکي که، عبارة ساءِني؟ ويه! بالس مان مونق ارتي عبارة هق لائين؟
- 14 اورغ منابور ساءِني، بنيه ڊي سروف دغن خبريغ بائڪ، هق توهن. کادغ ۲، خبران تو سروف جاتوه تغه جالن. اورغ بوليه دغر، تافي با ڊي دغر خبران تو، هييليس ماري رمفس دالم هاتي ڊي.
- 16 فس ار جوک، اورغ هاتي ڊي سروف تانه هق ار باتو باليق باوه. بنيه جاتوه، فس ڊي تريما سلالو دغن سوک هاتي.
- 17 تافي هق ڊي دغر تو، تاءِ لکت دهاتي، کران اکرڻ تاءِ چوکوف. ڊي تاءِ ليه تاهن لام. بيلا ڊي کنا کسوساهن، اتوا اورغ بولت پاڻ کا ڊي، دغن کران فرکتان توهن هق ڊي تريما تو، ڊي لوچوت سلالو.
- 18 فس اورغ لائين فول، سروف دغن تانه هق ار دوري، بنيه جاتوه

- 19 تو. اورغ ۲ ني تريما دغر سلالو، خبران تو. تافي يي دوق بيمبغ چارا حال كهيدوفن دي. يي نق ۲ كا هرت بندا، دغن سموا فركارا هق مائسي بركنن. فركارا ۲ ني له هق دوق كهوور ۲ بسر، سهيفڭ بري كاروت فركتان توهن تو، تاءليه توبيت بواه. .
- 20 تافي ار جوڭ، اورغ هق سروف دغن تانه سجوق. يي تريما بري لكت دهاتي سلالو، فس توبيت بواه موليق. ار هق سروف بوه سموتير، برانق تيڭ فولوه كاللي گندا. ار هق برانق انم فولوه كاللي گندا، فس ار هق برانق سراتوس كاللي گندا.

### فليتا كنا بري سولو دهتمفت تيغكي

- 21 فس عيسى اجر فواق تو سيكيت لاكي كات: بياس تيغوق كا بق، اورغ باوا فليتا ماري كي لتق باوه فاسو، اتوا دباوه كاتيل؟ تنتودق! دي كي لتق دهتمفت تيغكي، بري سولو سرات، بوكن؟
- 22 تنتوله اف ۲ هق دوق سوسوف، لام ۲ بوليه نمفق كا اورغ جوڭ. اف ۲ هق دوق تودوغ فون، لام ۲ نق بري بوڭ.
- 23 سبب تو، عيسى كات، فواق مو هق ار تليغا دغرله هق اكو رويت ده!
- 24 فس عيسى كات فول كا فواق تو: فرهاتيله بايڭ ۲ اف هق مو دغر! بالس مان مو حكوم كا اورغ، بالس تو جوڭ، توهن نق جاتوه حكوم اتس مو، تافي دغن تروق لاكي.
- 25 كران كا اورغ هق تريما ده سيكيت ۲، توهن نق تمبه لبيه لاكي، تافي كا اورغ هق تاءسير تريما اف سكارا، توهن نق امبيق هابيس، سموا هق دي ار تو.

### عبارة بنيه تغه ۲ دوق تومبوه

- 26 فس، عيسى هووڭ لاكي كات: بيلا توهن ماري امبيق فرينته

- 27 ڊي ڊالم هاتي ماءُ نسي، بولي به بنديغ سروف اورغ کي تابور بني به ڊالم بنديغ. وقتو مالم ڊي تيڊور جنڊرا، سياغ هاري ڊي کي بوات ڪڙج. تافي بني به تو ڊوق تومبوه سعمور تاءُ برادو، ڪهور ۲ تيغکي، ڪهور ۲ تيغکي. توان فون تاءُ تاهو بالس مان جادي.
- 28 جادي تانه سنڊيري هق بري تومبوه بني به تو، بري توبيت بواه مولا ۲ جادي چڊيغ، لفس تو ڊي بونتيغ، فس سود سڪالي ماسوق ايسي جادي بواه فنوه.
- 29 بيلا ماسق ده، توان فون کي مغم سلالو، ڪران ڊي تاهو ڪات سمفي ده فرياغ مغم.

### عبارة بوتير ساوي

- 30 فس عيسيٰ ڪات: بيلا توهن ماري امبيق فرينته ڊي ڊالم هاتي ماءُ نسي، نق بنديغ بالس مان؟ نق فاکي عبارة دغن اف بري بولي هوري؟
- 31 نق جادي سروف بوتير ساوي، بني به هق هالوس سڪالي ڊالم دنيا. اورغ امبيق سبوتير کي تانم.
- 32 فس، تاءُ لام، بني به تو ڪهور تومبوه، ڪهور تومبوه، لبيه بسر فد هق لائين، توبيت چايغ بايق، هيغک سمفي بوروغ ۲ بولي به ماري بوات سارغ تمفت تدوه اتس فوهون تو.
- 33 عيسيٰ مڃاگر دغن فاکي عبارة بايق فرڪارا، سروف ساءني، ستارا مان اورغ رامي بولي به ارتي، ستارا توله عيسيٰ مڃاگر.
- 34 عيسيٰ تاءُ ار رويت خبر ڊي ملائڪن فاکي عبارة ساج. تافي دغن صحابه ۲ ڊي، عيسيٰ هوري بري ارتي.

### عيسيٰ لارغ ريپوت

- 35 فد هاري تو، سبله فتغ، عيسيٰ ڪات ڪا صحابه ۲ ڊي: ماريله ڪيت جمرغ لاءُ وت ني!



- 36 فواق تو فون تيغگل اورغ رامي، ناءيك اتس فراهو تمفت عيسى تو، فس باوا عيسى توبيت سلالو. فراهو اورغ لائين فون اد جوگ دسيتو.
- 37 تيبا ۲ اغين رييوت قوا، اومبق ۲ برسمبور، اير ماسوق دالم فراهو دکت نق فنوه.
- 38 تکه تو، عيسى دوق تيدور چندرا دفوگکوغ فراهو، کفلا اتس بنتل. صحابة ۲ ري فون کي کرق عيسى کات: توان کورو! باء اف توان تاء فدولي کا کيت؟ دکت نق ماتي!
- 39 عيسى فون باغون، فس سوروه اغين تو: برادوله! فس ري سوروه اومبق ۲: تدوهله! اغين فون برادو، اومبق فون سيدغ هابيس.
- 40 عيسى فون فالينغ کات کا صحابة ۲ ري: باء اف مو فناکوت کيتو لالو؟ مو تاء فرچاي کا اکو لاکي که؟
- 41 فواق صحابة فون، براس تاکوت ساغت، فس کات سام ري: ايه! توان کورو کيت اورغ لاگو مان؟ سوروه اغين رييوت برادو، برادو!

### عيسى بري هيلغ سئورغ ماسوق هنتو

### باب 5

- 1 لفس فد تو، ري سمفي کا باليق سان لاءوت کاليل،
- 2 دکليواسن کادارا. با عيسى تورون دفراهو تو، اد سئورغ ماري دري کوا هق اورغ فاكي جاري قبور، نق تمو نغن عيسى.
- 3 اورغ تو ماسوق هنتو، فس ري دودوق دقبور تو سعمور. تاء اد سئورغ هابوق هق اد کواس بوليه کاري ري لاکي.
- 4 کران فد ماس دولو، بايق کالي ده، اورغ کاري کا کي تاغن ري، تافي کنف ۲ کالي کاري تو، ري بري فوتوس رنتي ۲، بري هنجور بيسي هق دوق دکاکي ري. ري قوا کيتو لالو، تاء اد سئورغ هق بوليه تاهن ري.

- 5 سياغ مالم ڏي ڊوق برجالن کي ماري، کي ماري، کوءِ دالم قبور،  
 کوءِ اتس بوکيت ۲ دسيتو، بلڻ ۲ ڏي برجریت امبيق باتو توريس  
 توبوه ڏي.
- 6 بيلا ڏي نمفق عيسی ماري تو، ڏي ڊوق جاءِ وه لاڳي. ڏي فون  
 هوڱل ماري سجود ڊافن عيسی، فس برجریت دغن سوارا درس  
 7 بلڻ ۲ کات: هي عيسی، انق توهن هق ڀڃ مهاتيڱي! مو نق  
 بوات کان دغن اڪو؟ اڪو مينٽاءِ اتس نام توهن، جاڻن مو بوات  
 سيقساله کا اڪو!
- 8 هنتو کات بالس تو، سبب عيسی ڊوق سوروه ڏي توبيت، کات:  
 هي هنتو، توبيتله دالم توبوه اورڱ ني!
- 9 فس عيسی تان هنتو تو: مو نام اف؟ اورڱ تو فون جواب: نام  
 اڪو رامي، سبب فواق اڪو اد بايق!
- 10 فس ڏي تبڀ مينٽاءِ تاءِ سير بري عيسی همبت هنتو ۲ تو توبيت  
 دڪليواسن تمفت تو.
- 11 جادي، دسيتو اد سڪاون بابي، بايق ايڪور، ڊوق چاري ماڪن  
 12 دتبڀ بوکيت. فواق هنتو فون مينٽاءِ دغن عيسی کات: بريله  
 اڪو کي ماسوق دالم بابي ۲ تو!
- 13 عيسی فون بئر بري کا ڏي. فس، فواق هنتو توبيت دالم توبوه  
 اورڱ تو، کي ماسوق دالم توبوه بابي فول. کاون بابي تو  
 لبیه کورڱ روا رييو ايڪور. سموا بابي تو فون، لاري ڪچيڪ  
 ڪفلا ۲، کي ترجون اتس توبير بوکيت، جاتوه دالم لاءِ وٽ لمس  
 ممفوس هابيس.
- 14 اورڱ ۲ هق ڊوق جاڳ کاون بابي تو، لاري کي رويت کا اورڱ دالم  
 ڪڍي، فس کي رويت کا اورڱ ڊدارت فول، بري سموا اورڱ فاڪت  
 ماري نق تيغوق ڪجادين ني.
- 15 ڏي ماري سمفي کا تمفت عيسی، فس جومغاءِ دغن اورڱ هق  
 ماسوق هنتو بايق تو، ڊوق مياتق سیتو. ڪائين باجو فون

- 16 ڀي فاکي، اوتق فون موليق سرورف سڊيا. اورغ . هق ماري  
 تيغوق سموا براس تاڪوت سوغڪوه.  
 فس، فواق هق تيغوق ده ڊولو، رويت ڪا فواق هق بارو ماري،  
 بالس مان ڪجاديڻ اورغ ماسوق هنتو تو، دغن ڪاون بابي .  
 17 سابيت تو، سموا اورغ تو فاڪت سوروه عيسيٰ توبيت فد نڪري  
 18 ڀي . تغه عيسيٰ دوق ناءِ ڪ اتس فراهمو، اورغ هق ماسوق  
 هنتو تو فون، مينٽاءِ دغن عيسيٰ ڪات: توان، بريله امب ڪي  
 ڪاتيڻ، سڪالي دغن توان!  
 19 تافي عيسيٰ تاءِ بري ڀي ڪي، دق . ڀي ڪات: ڪليقله ڪا رومه مو،  
 ڪي رويت ڪا سفوفو سفويغ، بري تاهو ڪا ڀي بايق مان توهن  
 تولوغ مو، بايق مان ڀي ڪسياغ بس ڪفد مو.  
 20 اورغ تو فون تيغگل عيسيٰ ڪي رويت خبر ني ڊالم بندر سفولوه  
 بندر تو، چاراحال هق عيسيٰ بوات ڪا ڀي. سموا اورغ هق دغر  
 فون براس حيران ساغت .

### انق ياءِ ڀر دوق ساڪيت

- 21 عيسيٰ فون جمرغ لاءِ وٽ ڪليڻ . بيلا ڀي سمفي ده ڪا فنتي ،  
 اورغ رامي ماري برهيمفون دتمفت ڀي .  
 22 فس ار سئورغ ڪتوا مسجد اورغ يهوي، نام ياءِ ڀر، ماري نق  
 چاري عيسيٰ . بيلا ڀي تموده، ڀي سجود ڪا ڪاڪي عيسيٰ فس  
 23 مينٽاءِ دغن عيسيٰ جوڪ ۲ ڪات: انق بتينا امب ساڪيت تروق .  
 مينٽاءِ توان ڪي لتق تاغن اتس ڀي بري سگر بولي هيدوف  
 لاڪي . عيسيٰ فون ڪي سڪالي دغن ياءِ ڀر تو .  
 24 تغه ۲ دوق برجالن ڪي تو، اورغ رامي ڪيتو لالو، هيغڱ سمفي  
 سسق ترق، دوق تمفوه مو اڪو سعمور .

اورغ بتينا ماري جامه باجو عيسى

- 25 دالم اورغ رامي تو، اد سئورغ اورغ بتينا، هق ساكيت تروق  
كلوار داره سعمور، دوا بلس تاهون ماري ده، سيقسا سوغكوه.
- 26 ني كي براوبت هابيس بومور، هيغك سمفي رويت تاء اد ستغ.  
تافي تاء هيلغ، كهوور ۲ تروق سعمور.
- 27 اورغ بتينا تو بياس دغر خبر عيسى. دي فون مپليت دالم اورغ  
رامي هيغك سمفي بلاكغ عيسى.
- 28 دي دوق فيكييركات: كالو اكو بوليه جامه بيراي فكاين دي ساج  
فادن ده، اكو نق هيلغ سلالو!
- 29 دي فون جامه بيراي باجو جوبه عيسى. با جامه، داره فون  
برادو سلالو. فس دي براس دالم. توبوه كات اييو فپاكيت هيلغ
- 30 ده. فد ملس تو جوگ عيسى تاهوكات كواس دي توبيت. دي  
فون فاليج تان: سياف ماري جامه فكاين كو ساءني؟
- 31 صحابة ۲ عيسى فون كات: ايه توان! اورغ دوق سسق ترق ني،  
باء اف توان كات اورغ جامه؟
- 32 تافي عيسى دوق اينتي لاكي، نق تاهو سياف ماري جامه دي.
- 33 اورغ بتينا تو كابري حال هق جاني كا دي. دي فون ماري دغن كتر  
كناليج سجدو كا كاكي عيسى، مفاكو سموا كا دي.
- 34 فس عيسى كات كا اورغ بتينا تو: تاء اف ميقي! كران مو فرچاي  
مو بوليه سيار ده. كليقله دغن سلامت! فپاكيت مو تو تاء اد  
اف ۲ ده.

انق ياءير بوليه هيدوف كليق

- 35 تكه عيسى دوق كات بالس ني، اد دوا تيگ اورغ باوا ماري  
خبر درومه ياءير كات: انق توان ماتي ده. تاء سه بري توان  
گورو گادوه كيله!
- 36 عيسى تاء فدولي كا هق فواق تو رويت ساءني، تافي دي فاليج

- کات کا یاءیر: جاغن تا کوتله! مو فرچاي، سوده!
- 37 لفس تو، عیسی لارغ، تاء بری اورغ رامی تورو ت دی، ملائینکن فیتروس، یعقوب دغن ادیق دی یحیا، تیگ اورغ تو.
- 38 بیلا دی سمفی کا رومه یاءیر، عیسی تیغوق نمفق سلیرق تابع، فس دی دغر بوپی سوارا تریاق تاغیس تو.
- 39 عیسی فون ماسوق تان اورغ دالم رومه تو: باء اف سلیرق تابع بالس نی؟ باء اف مو دوق تریاق؟ بوق تو تاء ماتی سکالی. دی دوق تیدور ساج.
- 40 فس فواق تو فاکت سوک مغنجیغ کا عیسی. عیسی فون سوروه دی ثوبیت، فس اجق مق فق سکالی دغن صحابة دی تیگ اورغ تو، کی ماسوق دالم بیلیق بوق هق ماتی.
- 41 فس، عیسی فکغ تاغن بوق تو، بلغ ۲ سوروه دی: تالیثا کوم!
- 42 معنائ: میق، مو باغونله! بوق تو فون باغون سلالو برجالن کی ماری کی ماری. تکه تو، عمور دی دوا بلس تاهون. بیلا فرکارا نی جایی، اورغ دالم بیلیق تو، فاکت ترکاکیت.
- 43 تافی عیسی لارغ دغن قواة، تاء بری رویت کا سیاف ۲. فس دی سوروه کات: بری ماکنله کا بوق نی!

### اورغ نصرۃ تاء سیر تریما عیسی

### باب 6

- 1 لفس تو، عیسی تیغکل تمفت تو، کی هادف کوء کمفوغ تمفت اصل دی، سکالی دغن صحابة ۲ دی.
- 2 فد هاری میغکو، عیسی فون کی مهاجر دمسجید اورغ یهودی.
- فس اد بایق اورغ دوق دالم مسجید تو. بیلا دی دغر فعاجران عیسی، دی براس حیران بلاک. دی فون کات: دی امبیق دمان سمو نی؟ کفنداین دی تو فیشین مان؟ فس، کواس دی ماری دمان، بولیہ بوات فرکارا ۲ فلیق؟
- 3 دی توکغ کایو تو، بوکن؟ انق مریم، جیلا! فس، یعقوب،

يوسيس، يودس دغن صيمون تو، ادقيق ۲ بي بلاك، بوكن؟ فس،  
ادقيق ۲ بتينا دي جادي ساءين كيت جوگا! سابيت تو، فواق ۲  
كمفوغ دي تو، تاءسير تريما عيسى.

4 تافي عيسى كات كا دي: اورغ جادي نبي دمان ۲ فون اورغ حرمة  
بلاك، ملائينكن دكمفوغ دي سنديري، ادقيق براديق، سفوفو  
سفويغ دي!

5 عيسى فون تاءليه بوات فركارا فليق سكارا دسيتو، ملائينكن دي  
بوليه بري هيلغ اورغ ساكيت، امفت ليم اورغ، دغن لتق تاغن  
اتس توبوه ري ماسيغ ۲.

6 عيسى براس حيران ساغت سيب اورغ دسيتو تاءسير فرچاي كا دي.

### عيسى هنتر صحابة ۲ دي دوا بلس اورغ

فس تو، عيسى توبيت كي كو دالم سموا كمفوغ دكليواسن  
تو، مهاجر اورغ.

7 دي فون فگگيل صحابة دوا بلس اورغ تو، فس هنتر كو تو دوا  
اورغ، كو ني دوا اورغ، كي بلاك. دي بري كواس كا فواق تو،  
بري بوليه همبت هنتو توبيت دالم توبوه اورغ.

8 فس، دي سوروه كات: جاغله مو باوا اف هق كنا فاکي تغه  
جالن ملائينكن توغكت. جاغن مو باوا بکل، اتوا کندي هق  
نق بوات مينتاء، اتوا دويت فون.

9 مو بوليه فاکي سليفر، تافي مو تاء كنا فاکي باجو دوا لافيس.

10 فس عيسى کات لاکي: سمفي کا کمفوغ، تمفت مان اورغ سمبوت  
مو، مو دودوقله درومه اورغ تو، هيغک سمفي مو نق تيغگل  
کمفوغ تو فول.

11 فس کالو مو کي سمفي کا ساتو تمفت، اورغ تاءسير سمبوت مو،  
اتوا جبیه تاءسير دغر فعاجران مو، مو كنا تيغگل له تمفت تو  
فس کلبس دبو تانه تمفت تو دکاکي مو، جاني تندا کات فواق

- 12 تو ساله. فواق صحابة تو فون، توبيت کي برشرح سوروه اورغ فالیغ توبت درفد دوسا۲.
- 13 ئي همت هنتو توبيت بايق، داورغ، فس، ئي بري هيلغ بايق اورغ ساکيت دغن ليسيقي مييق.

### چارا حال کماٽين نبي يحييا

- 14 فد ماس تو، راج هيروود دغر چارا حال کجادين نبي کران عیسی تیمبول نام سرات. اد اورغ هق دوق کات: ايه! اورغ ئي يحييا که، هق بري اورغ تريما روکون مندي تو؟ ئي هيديوف کليق سمولا، فس سابيت تو، ئي اد کواس بولييه بوات فرکارا۲ ني.
- 15 تافي اورغ لائين کات فول: ئي تو نبي الياس! فس اد لاکي هق کات: ئي تو نبي سروف نبي۲ دولو!
- 16 بيلا راج هيروود دغر فرکارا تو، ئي کات: ايه! تنتوله ئي يحييا هق بري اورغ تريما روکون تو. دغن سوروهن کو فنچوغ ده ئي، تافي لاني کان ئي هيديوف کليق فول؟
- 17 دولو جاني راج هيروود هق سوروه اورغ کي ايکت يحييا، ايکت بوه دالم گوڦ. ئي بوات بالس تو، کران سئورغ بتينا نام هيرودياس، هق دوق جاني لاکي بيئي دغن هيروود، ولو ئي جاني بيئي اديق هيروود ده فون، هق نام فيليف.
- 18 يحييا تو کاچغ لارغ کات: توانکو ساله حکوم کالو منيکاخ دغن
- 19 بيئي اديق! سابيت تو، هيرودياس فون براس سفکوت دهاتي نق بونوه يحييا. تافي تاءليه، سبب هيروود تاء بنر.
- 20 فد ماس تو، هيروود تاکوت کا يحييا، کران ئي تاهو کات يحييا تو اورغ بائیک، هق توهن فيليه بوات کرج ئي. سابيت تو هيروود جاگ يحييا، تاء سير بري جاني اف۲. ئي برکن دغر هق توهن رويت، ولو ئي گرم، گنف۲ کالي ئي دغر فون.
- 21 سود سکالي، هيرودياس تو اد فلواغ. فد هاري ايغت کا هاري

برانق راج هيرود، راج فاده اورغ ۲ هق دوق باوه ډاگو ښي  
دغن ڪتوا ۲ عسڪر، دغن رعيت ښي هق فريشڪت تيغڪي دالم نڪري  
گاليل، ماري ماڪن جاموان بلاڪ.

22 فس انق بتينا هيرودياس ماري مناري دافن راج، بري سوڪ راج  
دغن سموا هق فاده سائي. هيرود فون رويت ڪا بودق بتينا  
تو: مو نق ڪاف؟ اف ۲ هق مو نق، اڪو نق بري بلاڪ!

23 راج جنجي دغن برسومغه اتس نام بايق فرڪارا ڪات: اف ۲ هق  
مو نق، اڪو جنجي نق بري، ولو سبله نڪري ڪو فون!

24 بودق بتينا تو فون توبيت ڪي تان مق ڏي: مق سوروه انق  
مينتاء ڪاف؟ مق ڏي جواب: مو ڪنا مينتاء ڪفلا يحياء هق بري  
اورغ تريما روڪون تو!

25 بودق تو فون ڪي سلالو ڪا تمفت راج، نق تونتوت دغن ښي  
ڪات: توانڪو، امب نق مينتاء ڪفلا يحياء هق بري اورغ تريما  
روڪون منڊي تو، لاني جوڳ، بوه دالم فيغڪن بري ڪا امب!

26 هق بودق تو مينتاء بري راج سوسه هاڻي، تافي تاء ليه داليه  
ڪران ښي جنجي دغن برسومغه، دافن اورغ رامي هق ڪنا فانه تو.

27 راج فون سوروه سئورغ عسڪر ڪي فنچوڻ يحياء، باوا ڪفلا ښي ماري.  
عسڪر تو فون ڪي فنچوڻ يحياء، امبيق ڪفلا ښي بوه دالم فيغڪن

28 باوا ماري بري ڪا بودق بتينا تو. بودق تو فون، امبيق باوا  
ڪي ڪا مق ڏي فول.

29 بيلا مريد ۲ يحياء دغر خبر تو، ڏي ماري امبيق مائيت يحياء،  
ڪي تانم.

### عيسی بري ماڪن ڪا ليم رييو اورغ

30 لفس تو فول، صحابه ۲ عيسی ڪليق ماري تمو دغن عيسی،

فس ڏي رويت ڪا عيسی سموا هق ڏي بوات هق ڏي اجر ڪا اورغ.  
31 دسيتو اورغ برلومبا ۲ ڪي ماري، هيغڪ سمفي عيسی دغن



- صحابه ۲ دي تاء ار فلوغ نق ماكن. عيسى فون رویت کا دي :  
 ماري کيت کي دوق ساتو تمفت اورغ تاء ار، بري فواق مو بوليه  
 برادو لتيه سبنتر.
- 32 فواق دي فون ناءيك فراهو، جمرغ کي کا تمفت سوپي .
- 33 تافي بايق اورغ نمفق فواق عيسى کي، فس دي تاهو سلالو کات  
 سياف کي تو. دي فون توبيت دکمفوغ ۲ دي، فس تورووت کي  
 برجالن کا کي. دي فون سمفي دولو فد فواق عيسى، کا تمفت  
 دي دوق هادف تو.
- 34 بيلا عيسى توروون فراهو ديک نون، نمفق فواق تو برلومبا ۲  
 ماري. دي فون براس کسياغ کا فواق تو، سبب دي دوق سروف  
 بيرغ هق تاء ار توان. فس عيسى دوق مفاجر دي، چارا حال  
 بايق فرکارا .
- 35 بيلا سمفي فتح کارغ، صحابه ۲ عيسى ماري کيچيک رغن دي کات :
- 36 هي توان ! نق کلف ده، فس سيني رومه تاء ار. بائیک توان  
 سوروه اورغ رامي ني کي کا کمفوغ ۲ دکت، اتوا کدي فون، نق  
 بوليه بلي ماکن.
- 37 تافي عيسى رویت کا صحابه ۲ دي : موله بري ماکن کا دي ! فس  
 فواق صحابه تان عيسى : فس، توان نق سوروه امب کي بلي  
 روتي سمفي امفت رييو کوف که، بري سمو ني ماکن؟
- 38 عيسى فون تان کليک کات : روتي هق دوق سيني، ار براف  
 بوتير؟ چوب کي تيغوق ! بيلا دي تيغوق ده، دي ماري رویت  
 کا عيسى : ار روتي ليم بوتير، فس ايکن دوا ايکور !
- 39 لفس تو، عيسى رویت کا صحابه ۲ دي، سوروه بري اورغ رامي  
 دودوق ستومفوق ۲ دتمفت رمفوت هيچو. اورغ رامي توفون،
- 40 دودوق ستومفوق ۲، ار هق سراتوس اورغ، ار هق ليم فولوه اورغ.  
 41 لالو عيسى امبيق روتي ليم بوتير، ايکن دوا ايکور تو، لغثک  
 ناءیک کا لاغيت، اوچف تريما کاسيه کا توهن. لفس تو، دي

- چوبیق ۲ روتي کهور ۲ بري کا صحابة ۲ دي سوروه بهاکي کا اورغ  
رامي تو. ايکن دوا ايکور تو فون، دي بهاکي سروف تو جوگ.  
42 سمو اورغ رامي تو ماکن کيغ بلاک.  
43 فس روتي دغن ايکن هق لبیه اورغ ماکن تو، صحابة ۲ عیسی  
فون امیق فرهیمفون ۲ بوه دالم باکول، بولیه دوا بلس باکول  
44 فنوه. کيرا اورغ جنتن سمو، اد لبیه کورغ لیم ریو اورغ هق  
ماکن روتي تو.

### عیسی برجالن اتس ایر

- 45 بیلا سوده بري ماکن تو، عیسی سوروه صحابة ۲ دي ناءیک  
اتس فراهو گی دولو فد دي کا بیت صایدا، بالیق سان لاءوت.  
عیسی سنديري ننتي نق بري اورغ رامي تو کلیق دولو.  
46 بیلا عیسی سوده بري سلام کا فواق ۲ تو، دي کي ناءیک  
بوکیت نق برعا.  
47 سوده کلف ده، فراهو تو دوق تغه لاءوت. عیسی فون دوق  
سنورغ ددارت لاکي.  
48 دي نمفک کات صحابة ۲ دي دوق فایه کایوه، کران اغین دوق  
تمبا دي درس. سبب تو، بیلا دکت نق سمفي دینهای  
عیسی فون برجالن اتس ایر کي کا تمفت صحابة ۲ دي.  
49 دي نق لفس دولو فد فراهو، تافي صحابة ۲ نمفک اورغ دوق  
برجالن اتس ایر، فس دي برجریت کات: هنتو، باغت هنتو!  
50 کران بیلا دي سمو نمفک، دي ترکجوت بلاک. تافي عیسی  
فغکیل کا دي سلالو، کات: تکوهله هاتي مو! جاغن مو تاکوت،  
ني اکو سنديري!  
51 دي فون ناءیک اتس فراهو دوق سکالي دغن صحابة ۲ دي. فس  
اغین تدوه سلالو. صحابة ۲ تو براس حیران ساغت، کران  
52 دي تاءرتي لاکي چارا حال روتي لیم بوتیر هق بري ماکن کا

اورغ رامې تو. فيکيران دي نق فهم تاء هابيس لاکي.

### عيسى بري سيار اورغ ٢ ساکيت دکنساريت

- 53 لفس تو، فواق عيسى کي سمفي کا دارت دمقيم کنساريت،  
سبله سان لاءوت تو، هيريت فراهو اتس دارت، تمبت .
- 54 تغه ٢ دوق تورون فراهو، اورغ رامې دسيتو چم عيسى سلالو.
- 55 دي فون هوغل کلپک کي رویت کا اورغ رات ٢ تمفت دکليواسن  
تو، سوروه باوا اورغ ساکيت، دوق اتس ٢ کرغ، کي دتمفت مان
- 56 بوپي کات عيسى ا. فس دمان ٢ تمفت عيسى کي، دکمفوغ اتوا  
دبندر، اتوا دباروه فون، اورغ باوا اورغ ساکيت کي، دتمفت مان  
اد اورغ برهيمفون. فس دي مينتاء دغن عيسى بري اورغ ساکيت  
بوليه جامه تفي باجو جوبه دي فون، فادن ده. فس سموا اورغ  
هق جامه ده سيار بلاک.

### چارا حال اتوران تو نينيق مويغ

باب ٧

- 1 فد ماس تو، اورغ دالم قوم فريسي، سکالي دغن کورو ٢  
کتاب تورات، هق ماري دکوت جروسليم، دوق ليغکوغ کلپليغ
- 2 عيسى. فواق ني تيغوق کات انق ٢ مريد عيسى، بلوم دي نق  
ماکن، دي تاء باسوه تاغن ايکوت اتوران هق فواق فريسي.
- 3 کران قوم فريسي سکالي دغن سموا اورغ يهوي، توروت اتوران  
هق دي تريما درفد تو نينيق مويغ دي، کات تاليه ماکن  
اف سکارا ملاينکن دي باسوه تاغن ايکوت اتوران تو.
- 4 فس بارغ هق دي بلي دکي فون، تاليه ماکن جوک، ملاينکن  
باسوه ايکوت اتوران. اتوران ٢ هق دي تريما درفد تو نينيق  
مويغ، اد بايق لاکي، سروف اتوران کنا باسوه مفکوق فيغکن،  
فريوق تمباک، اتوا تمفت تيدور فون.
- 5 سابيت توله، فواق فريسي دغن کورو ٢ کتاب تورات فاکت

6 ماري تان عيسى کات: ٻاءُ اف انق مريد مو تاءُ توروت فغاچران  
توئ نينيق مويغ فواق ڪيت؟ ٻاءُ اف ٻي ماڪن دغن دغن چمر؟  
عيسى فون جواب ڪا ٻي کات: هق نبي يعشيا رويت دولو چارا  
حال فواق مو بتول سوغوگوه. فواق مو هق تيغوق مانيس لوار  
سروف ٻي تولىس دالم ڪتاب، کات:

فواق ني حرمة ڪا اڪو دغن مولوت، توهن کات،  
تافي هاتي ٻي تاءُ ايغت لغسوغ ڪا اڪو!  
تاءُ ار فائده ٻي سمبه ڪا اڪو، ڪران هق ٻي دوق  
مغاچر کات حڪوم ۲ توهن، جادي هق مائسي ساج.

8 فس عيسى کات: فواق مو بوات تاءُ ترفاڪي ڪا حڪوم توهن، امبيق  
9 فاڪي فغاچران مائسي ڪنتي! فواق مو فندي نق تولق حڪوم ۲  
توهن دالم ڪتاب، سابيت نق اغڪيت فغاچران مو سنديري.  
10 ڪران نبي موسي سوروه کات:

مو ڪنا فادول ڪا ايبو باف مو دغن حرمة. فس،  
ڪالو اورغ ڪيچيق مغهوبوه چارا حال ايبو باف ٻي  
تنتو ڪنا حڪوم بونوه.

11 تافي فواق مو مغاچر کات: ڪالو سياف ار هرت، هق سوغ  
بوليه سارا ايبو باف، تافي ٻي تاءُ سير فاڪي بالستو، تاءُ اف،  
ٻي بوليه رويت ڪا ايبو باف: هرت تو جادي قربان ده.  
معنان، چادغ ده نق بوات خيرات ڪا توهن.  
12 ايكوت فغاچران فواق مو، بلر اورغ تو تاءُ ڪنا فادول ڪا ايبو  
باف ٻي، تاءُ اف!  
13 دغن باوا فغاچران توئ نينيق مويغ مو، ڪي بوات اجر اورغ  
بالس ني، مو تاءُ فادول ڪا فرڪتائن توهن. فس ار بايق فرڪارا  
لاڳي سروف ني، هق مو دوق بوات سمعور.

### بارغ ٢ هق بري اورغ چمر

- 14 فس تو، عيسى فغكيل اورغ رامي سكاللي لاگي، ماري ماسوق دکت، نق رويت کا ري: دغرله فواق مو سمو! فس بري ماسوق هاتي، هق اکونق رويت ني!
- 15 تاءار اف سکارا هق ماسوق دالم تبوه اورغ، نق بري دي چمر هاتي. جادي فرکارا ٢ هق کلوار تبويت دالم هاتي اورغ، هق بري چمر جاني دوسا.
- 16 فواق مو هق ار تليغا، فاکي دغرله!
- 17 بيلا عيسى تيغکل اورغ رامي تو، کي ماسوق دالم رومه، صحابة ٢ بي ماري تان چارا حال عبارة تو.
- 18 عيسى جواب کا ري: ايه! فواق مو تاءفندي لبيه فد اورغ لائين لاگي که؟ بءاف مو تاءارتي کات تاءار اف سکارا هق ماسوق دالم تبوه اورغ، نق بري دي چمر سوغکوه.
- 19 سبب فرکارا ٢ ني تاءماسوق دالم هاتي، تافي ماسوق دالم تالي فروت، فس کي تبويت دالم جمن فول.
- 20 (دغن کات بالس ني، عيسى مفاکو کات، بوليه ماکن بلاک.) عيسى هو بوغ لاگي کات: جادي فرکارا هق کلوار تبويت دالم اورغ، هق بري دي چمر.
- 21 کران دالم مائسي، ياءيت دالم هاتي دي، تيمبول سمو فيکيران جاهت هق فيمفين دي بري بوروق بهاس دي، بوات چوري بارغ اورغ، بونوه اورغ، بوات زنا، طمع، فس بري بوات بايق فرکارا هق جاهت، بري دي نق تيفو اورغ، تاءمالو بيلا بوات هق تاءفاتوت، دغکي کا اورغ، کيچيق مغوفت، سومبوغ فس فيليه بوات هق بودوه.
- 23 فرکارا هق جاهت ني، سمو تيمبول ماري دالم هاتي مائسي بري دي چمر.

### اورغ بتينا بغسا لائن فرچاي سوځگوه

- 24 لفس تو، عيسی تيځگل تمفت تو، هوندور کي کوء تعلقو  
بندر صور. دي کي ماسوق دالم رومه اورغ دسيتو، کران تاء سير  
بري اورغ لائن تاهو کات دي دوق سیتو، تافي نق دوق منوسوف  
تاءليه.
- 25 فس اد اورغ بتينا سئورغ هق انق بتينا دي ماسوق هنتو. دي  
دغر خبر کات عيسی ماري ده، فس دي کي سلالو کا تمفت عيسی  
سجور دافن دي.
- 26 اورغ بتينا ني، دي اورغ بغسا لائن، هق برانق دنکري صورو-  
فونيکيا. دي مینتاء سوروه عيسی همت هنتو توبيت دالم توبوه  
انق دي تو.
- 27 تافي عيسی جواب کا دي کات: کهور موليق کيت بري ماکن کا  
انق ۲ درومه دولو. نمفق سروف تاء موليق امبيق مکانن هق  
انق ۲ تاهوق بري کا انجيغ!
- 28 اورغ بتينا کات: کناله هق توان کات سائي! تافي انجيغ ۲ هق  
دوق بباوه ميجا توان، دي بوليه ماکن هق انق تاء سير بوکن؟
- 29 عيسی فون کات کا دي: سبب هق مو جواب تو موليق، مو بوليه  
کليقله کا رومه. هنتو توبيت ده دالم توبوه انق مو!
- 30 اورغ بتينا تو فون، کليق کا رومه، تيغوق انق بتينا دي تو دوق  
تيدور سنغ. هنتو تو توبيت سوځگوه ده.

### عيسی بري سيار اورغ بيسو تولي

- 31 لفس تو، عيسی تيځگل تعلقو بندر صور، فس برجالن  
کي لاڳي کوء بندر صيدون، هيځځ سمفي کليق کا تفي لاءوت  
کاليل، دغن لځکه کليواسن سفلوه بندر تو.
- 32 دسيتو اد سفواق اورغ هق باوا اورغ بيسو تولي، ماري مینتاء

- 33 عيسی سوروه لتق تاغن اتس دي. عيسی فون باوا دي کي سوکو فد اورغ رامي. فس دي هولور جاري چوچوه دالم تليغا اورغ تو دوا بله، فس دي لوده کا تانه، چوليق دغن جاري دي تيق کا لیده اورغ تو فول.
- 34 فس تو عيسی لغکک نايک کا لاغيت، مغلوه، لالو کات کا اورغ تو: ايقاتر! (معنا: بوکاله!)
- 35 تليغا اورغ تو تربوک، لیده فون لمبيق سلالو، بوليه کيچيق
- 36 موليق. عيسی لارغ فواق تو کات جاغن رويت کا سياف. تافي کهور عيسی لارغ، کهور دي باعث رويت.
- 37 فس سموا اورغ هق دغر خبر تو براس ترحيران بلاک. فواق تو کات: موليق بئر هق دي بوات! تايکيرا اورغ بيسو تولي فون دي بوليه بري سيار بلاک.

### عيسی بري ماکن کا امفت رييو اورغ

### باب 8

- 2-1 لفس تو تايلام فول، اورغ رامي هق لايين ماري برهيمفون. بيلاهابيس ده ماکن دي، عيسی فون فنگيل صحابة ۲ دي ماري، فس کات: اکو براس کسياغ بلس سوغگوه، تيغوق کا فواق فواق ني. دي ماري دوق سيني سمغي تيگ هاري ده، فس لاني هابيس ده ماکن دي. کالو اکو سوروه کليق دغن تايبري ماکن اف سکارا کا دي، تاکوت کي ربه تغه جالن، کران ار هق ماري جاءوه.
- 4 فواق صحابة عيسی تان دي کات: کيت دوق جاءوه فد رومه اورغ. فس نق امبيق دمان، چوکوف بري ماکن کا اورغ رامي سروف ني؟
- 5 عيسی تان دي کليق کات: روتي ار براف بوتير لاگي، سيني؟  
دي جواب: ار توجه بوتير، توان.
- 6 عيسی سوروه اورغ رامي دوق مياتق اتس تانه دولو. فس دي

امبيق روتي توجوه بوتير تو، مغوچف تريما كاسيه كا توهن،  
فس تو چوبيق ۲ هولور كا صحابة ۲ ني، سوروه ني بهاكي كا  
اورغ رامي سائي. صحابة ۲ عيسي تو فون، بوات ايڪوت عيسي  
سوروه.

7 فس اد جوڳ، ايڪن هالوس دوا تيڳ امفت ايڪور. عيسي فون  
اوچف تريما كاسيه انتوق ايڪن ۲ ني، فس سوروه صحابة ۲ ني  
ڪي بهاڪي جوڳ.

8 ڪنف ۲ اورغ ماڪن ڪيڳ بلاڪ. فس اد سموا لبيه ڪورغ امفت ريبو

9 اورغ. لفس تو، فواق صحابة فون ڪوتيف فرهيمفون بوه دالم  
باڪول، بوليه توجوه باڪول، هق لبيه اورغ ماڪن.

10 عيسي سوروه اورغ رامي تو ڪليق، فس ني سنديري نائيڪ فراهو  
سڪالي رغن صحابة ۲ ني، ڪي سمفي كا تعلق دلمانوتر.

### فواق فريسي سوروه عيسي بوات فرڪارا فليق

11 فد ساتو هاري، اد اورغ فريسي ماري كا تمفت عيسي، نق  
بحس رغن ني. فواق تو فاکت نق بوات بوڪو كا عيسي.  
سابيت تو، ني سوروه عيسي بوات ساتو فرڪارا فليق، جادي  
تندا کات توهن برڪنن كا عيسي.

12 عيسي فون مغلوه، فس جواب كا ني کات: باءاف اورغ لافيس  
لاني فاکت سوروه اڪو بوات فرڪارا فليق؟ سوڻگوه توهن  
تاءيري تندا بالس تو، كا اورغ لافيس لاني.

13 فس عيسي تيغگل فواق تو، ڪي نائيڪ فراهو سڪالي لاڪي نق  
جمرغ لاءوت.

### فغاجران فواق فريسي بنديغ رغن ايبو روتي

14 تغه فواق صحابة روق جمرغ لاءوت تو، ني ترلوف باواء  
بڪس روتي، اد سبوتير ساج دالم فراهو.



15 عيسى فون فرايشت كا دي كات: مو جاڳ باء يك ٢ له! بري ري ري  
 مو جاءوه فد ايبو هق فواق فريسي دغن راج هيروو بوه دالم  
 روتي دي!

16 فواق صحابة ٢ عيسى فون دوق سوءال سام سنديري، فس كات:

تنتو توان كات بالس تو، سبب كيت تاءار باواء بگل روتي؟

17 عيسى تاهو هق فواق تو دوق سوءال. سابيت تو دي تان كات:

باءاف مو دوق كيچيق چاراحال روتي، بگل هق مو تاءار باواء تو؟

مو تاءار تاهو ار تي لاکي که؟ ايه! سروف اوتق مو فايه ماکن!

18 مات ار، بقاءاف مو تاءار تيغوق؟ تليغا فون ار، بقاءاف مو تاءار دغر؟

19 مو تاءار ايشت که، هق اکو چوبيق روتي ليم بوتير تو، بهاکي

کا اورغ ليم رييو اورغ؟ فس هق لبيه لاکي، مو کوتيف بوليه

براف باکول؟ فواق تو جواب: دوا بلس باکول، توان.

20 عيسى فون تان فول: فس سکالي تو، هق اکو چوبيق روتي توجهوه

بوتير، بهاکي کا اورغ امفت رييو اورغ تو، هق لبيه لاکي مو

کوتيف بوليه براف باکول؟ فواق تو فون جواب: توجهوه باکول

21 توان. فس عيسى کات: بالس تو فون، بقاءاف مو تاءار تي لاکي؟

### عيسى دغن سيورغ مات بوت

22 لفس فد تو، عيسى دغن فواق صحابة دي سمفي کا کمفوغ

بيت صايدا. دسيتو ار سفواق هق باواء اورغ مات بوت ماري

کا تمفت عيسى، مينتاء سوروه عيسى جامه بري سيار مات دي تو.

23 عيسى فون فکغ تاغن اورغ بوت، فيمفين توبيت کي لوار کمفوغ.

لفس فد لوده اير ليور اتس مات اورغ تو، عيسى هولور تاغن

جامه مات اورغ تو، بلغ ٢ تان دي کات: بوليه نمفق اف کاتيقي؟

24 اورغ تو بغه، فس دي کات: بوليه جوگ نمفق اورغ، تافي کماير

سروف فوهون هق دوق برجالن کي ماري!

- 25 عيسى فون لتق تاغن دي سكالې لاکي اتس مات اورغ تو. سكالې ني، دي کهور تيغوق کهور چره، هيغځ سمفي نمفق چرف بلاک.
- 26 لفس تو، عيسى سوروه دي کليق کا رومه، دغن لارغ کات: مو جاغن ماسوق کوء کمفوغ ساءني ديه!

### فيتروس مفاکو کا عيسى

- 27 لفس فد تو فول، عيسى دغن صحابة ۲ دي کي کا کمفوغ ۲ دالم کليواسن قاءيصريا فيليني. تغه ۲ دي بوق برجالن تو، عيسى فالينغ تان دي کات: رويتله کا اکو، اورغ رامې کات بالس مان چارا حال اکو؟
- 28 صحابة ۲ دي جواب: اد اورغ هق کات توان جادي يحيا، هق بري اورغ تريما روکون مندي تو. فس اد جوگ هق کات نبي الياس. فس اد لاکي هق کات توان جادي سئورغ دالم فواق نبي دولو.
- 29 عيسى فون تان لاکي: فس فواق مو سنديري، نق کات بالس مان، چارا حال اکو؟ فيتروس جواب: توان جادي المسيح هق توهن جنجي تو!
- 30 عيسى فون سوروه دي کات: مو جاغن رویت کا سیاف چارا حال ديري کو ديه!

### عيسى رویت چارا حال دي ماتي کنا سيقسا

- 31 فس تو، عيسى مولا ئي مفاجر فواق صحابة دي کات: اکو ني، مائسي هق تورون دشرک، مستي کنا سيقسا بايق فرکارا فس فواق کتوا ۲، امام ۲ بسر، دغن گورو ۲ تورات، نق تولق، تاء سير دغر کا اکو. اکو نق کنا حکوم بونوه سمفي ماتي، فس دالم تيگ هاري، اکو نق بوليه هيديوف سمولا.
- 32 عيسى کات بالس تو، نق بري جلس کا فواق صحابة دي.

سابيت تو، فيتروس كويت عيسى كي کا تغي سيڪيت، نق تگه ري،  
ٽاء سير بري کيچيق بالس تو.

33 تافي عيسى فالينغ تيغوق کا فواق صحابة ري. ري فون تگه  
فيتروس کليق کات: هي هيليس، کيله! فيکيران مو هق امبيق  
رمائسي، بوکن هق امبيق رتوهن.

34 لفس فد تو، عيسى فغکيل اورغ رامي، دغن صحابة ٢ ري ماري،  
فس ري اجر بالس ني کات: سياف ٢ نق تورت کي سکالي دغن  
اکو، اورغ تو کنا ترلوف رايب کا ڊيري ري، امبيق فاکي کايو  
امفت چابغ هق ترهينا تو، تورت اکو کي.

35 کران سياف ٢ دوق ترايغت کا ڊيري ري، نق بوليه سلامت،  
اخير، پاوا ري نق روکي. تافي سياف ٢ جوغ سره پاوا ري،  
کران ري کاسيه کا اکو، فس کران خبر يڄ باء يک، تنتو ري  
نق بوليه سلامت پاوا ري، ر اخيرة.

36 کران اف فائده کا اورغ، هق نق بوليه لاب سرب سروبي دنيا  
تافي سود سکالي، پاوا ري سنڊيري نق هيلغ هابيس؟ ٽاء ار  
فائده سيڪيت هابوق.

37 اتوا هق مان لاب دالم دنيا مهل لمبيه فد نق بوليه پاوا ر-  
اخيرة؟ تنتو ٽاء ار سکارا هابوق.

38 سابيت توله، دالم فرياغ هق جاهت ني، هق اورغ ٽاء امبوه  
دغر توهن، کالو ار اورغ مالو نق مڱاڪو کا اکو اتوا فغاچران  
اکو، عيسى کات، ننڌي ماسن دافن، اکو فون نق مالو مڱاڪو  
کا اورغ تو جوڳ، فد ماس اکو، مائسي هق تورون دشرڱ، نق  
تورون ماري سمولا دغن کمليان هق باف کو، فس سکالي دغن  
ملاءيڪه ٢ هق يڄ سوچي تو.

## باب 9

1 فس عيسى کات لاڳي: ايغتله هق اکو نق رويت ني! دالم رامي ٢  
سيني، ار سفواق هق تغه ري دوق ار لاڳي اتس دنيا، ري نق

بوليه نمفق كات توهن امبيق ده فرينته يي، دغن كواس.

### عيسى بري نمفق روف يي لاكو لائين

- 3-2 لفس تو انم هاري لاكي، عيسى تيفگل اورغ رامي تو، باوا<sup>۱</sup> فيتروس، يعقوب دغن يحيا، فيمفين ري ناء<sup>۲</sup> يك اتس بوكيت تيفگي. تغه فواق صحابة دوق تيفغوق عيسى، روف عيسى براويه جادي روف لائين. فكاين يي فون سينر بانر، تاء<sup>۳</sup> اد سياف بوليه باسوه بري فوتيه سروف تو.
- 4 تيبا ۲ صحابة عيسى تيگ اورغ تو، نمفق نبي الياس دغن نبي موسي، دوق كيچيق دغن عيسى.
- 5 فيتروس فون رويت كا عيسى: توان گورو، موليقله كيت دوق دسيني! كيت نق بوات بغسل تيگ تمفت، انتوق توان گورو سا، انتوق نبي موسي سا، فس انتوق نبي الياس سا.
- 6 سسوغلوهن، فواق صحابة تو تاكوت ساغت، هيگك سمفي فيتروس تاء<sup>۴</sup> ايغت هق يي سبوت ساء<sup>۵</sup> ني.
- 7 لفس تو فول، اون ماري فرليندوغ يي، فس بوپي سوارا دالم اون تو كات:
- اينيله انق كو سجاتي، هق اكو كاسيه بنر.  
مو كنا دغرله كا يي!
- 8 فواق صحابة تو فاليج تيفغوق كليليغ، تافي تاء<sup>۶</sup> اد نمفق سياف. هق نمفغن عيسى ساج، هق دوق دغن يي لاكي.
- 9 بلغ ۲ يي امفت اورغ تورون دبوکيت، عيسى فسن كا يي كات: مو جاغن رويت كا سياف ۲ فون، فرکارا هق مو نمفق ده، جق دهاري ني هيگك سمفي اكو، مائسي هق تورون ماري دشرگ ني، ماتي هييدوف كليق سمولا.
- 10 صحابة تيگ اورغ تو فون طاعة اف هق عيسى فسن ساء<sup>۷</sup> ني، تافي يي سوال جواب مو اكو تيگ اورغ تو، اف معنا هق

عيسى کات، ماتي هيڊوف كليق تو.

11 ڀي تان عيسى کات: توان، باءِ اف گورو ۲ تورات کات مستي ڀي

12 الياس کنا ماري ڊولو؟ عيسى جواب کات: تنٽوله الياس کنا ماري

ڊولو، بري سيف ده سما فرکارا. تافي ايغٽله! کتاب توهن

کات، مائسي هق تورون ماري بشرک ڀي، نق کنا سيڦسا بايق

فس اورغ نق تولق تاءِ سير تريما ڀي.

13 اڪو رويت گھد مو، الياس ماري ده، فس اورغ ۲ لائين فون بوات

کا الياس ايڪوت سير ڀي، برلاک دغن ايات دالم کتاب، هق

کات بالس تو جوگ.

---

عيسى بري سيار بوق هق ماسوق هنتو

---

14 بيلا عيسى دغن تيگ اورغ تو تورون ماري کا تمفت صحابه ۲

هق تيگل ڊولو، ڀي نمفق اد اورغ رامي دوق کليليغ صحابه ۲ تو،

فس سفواق گورو تورات دوق بحس دغن ڀي جوگ.

15 با نمفق کات عيسى ماري ده، اورغ رامي فون براس حيران،

هوگل کي سلالو نق بري سلام کا ڀي.

16 عيسى فون تان صحابه ۲ ڀي کات: مو دوق سوائ جواب کاف دغن

ڀي؟

17 فس اد سئورغ دالم رامي ۲ تو هق جواب: توان گورو، امب باوا

انق جنٽن ماري چاري صحابه ۲ توان، سبب ڀي ماسوق هنتو

18 جادي بيسو. افبلا ماسوق، رمبس بري ڀي جاتوه کا تانه،

بريوه مولوت، کاجيت کيکي، کرس کاکي تاغن سلالو. امب

ماري مينٽا دغن مريد ۲ توان گورو، تولوغ همبت هنتو توبيت،

تافي ڀي نق همبت تاءِ ليه.

19 عيسى فون رويت: ايه! فواق مو کورغ فرچاي ساغت. لام مان لاڳي

اڪو کنا دوق سڪالي دغن مو، بري مو ارٽي؟ لام مان لاڳي،

بوليه اڪو صبر دغن مو؟ کي اميقله بوق تو، باوا ماري سيني!

- 20 ڊي فون ڪي، امبيق بوق باوا ماري. با هنتو نمفق عيسو، ڊي بري بوق تو بوات ساون، ربه ڪا تانه، ڪلفر ڪي ماري، بلغ ۲ يويه مولوت.
- 21 عيسو فون تان فق ڊي: لام مان ده، ڊي جايي بالس ني؟
- 22 فق ڊي جواب: تڪه ڊي ڪچيڪ لاکي، بايق ڪالي ده، هنتو چوب نق بونوه بوق تو، دغن جاتوه دالم افي، دالم اير. ڪسياغله! تولوغله ڪا امب، ڪالو توان بوليه بوات!
- 23 عيسو ڪات: اڪو بوليه، اصل مو بوليه. تاء اد اف سڪارا فون، حق ڪات تاء ليه بوات، اصل اورغ فرچاي قواة!
- 24 فق بوق تو فون ترياق ڪات: امب فرچاي، تافي ڪورغ چوڪوف! تولوغله توان، بري امب فرچاي لاکي!
- 25 عيسو فرهاتي تيغوق ڪات اورغ رامي هوغگل برگاس ۲ ماري. سبب تو، ڊي سوروه هنتو ڪات: ها، هنتو حق بري بيسو تولي! توبيتله درفد توبوه بوق ني! فس جاغن سڪالي ۲ مو ماسوق فول دالم ڊي!
- 26 هنتو فون برجریت، بري بوق تو بوات ساون تروق سڪالي، فس تو توبيت، تيغگل بوق دوق سييتو، نمفق سروق مایت، هيغگل سمفي ڪبايقن اورغ ڪات: اوه، بوق تو ماتي ده! تافي عيسو فگغ تاغن ڊي اغکيت. بوق تو فون باغون.
- 27 بيلا عيسو ماسوق ده دالم رومه، صحابة ۲ ماري تان ڊي دغن
- 28 سيف ۲ ڪات: باء اف فواق ڪيت بوليه تاء ليه همبت هنتو توبيت؟
- 29 عيسو فون جواب: هنتو ماچم ني نق همبت تاء ليه، ملاينکن دغن ڪواس مينتاء دعا ساج.

عيسو رويت ڪالي بيغ ڪدوا حال ڪماتين ڊي

- 30 فواق عيسو فون تيغگل تمفت تو، برجالن ڪي لاکي، ڪو نڪري ڪاليل. عيسو تاء سير بري تاهو ڪا سياف فون، دمان ڊي

- نق دودوق، سبب دي دوق اجر صحابة ۲ دي .
- 31 فس عيسى رويت بلس ني: اكو، مائسي هق تورون ماري دشرگ ني، نق كنا سره كا تاغن مائسي، هق نق بونوه بري ماتي . تافي لفس ماتي، دالم تيگ هاري اكو نق هيدوف كليق سمولا .
- 32 فواق صحابة دي تاءارتي، اف معنا هق عيسى اجر تو، تافي دي تاءبراني نق تان.

### اورغ مان فريگت تيغكي

- 33 فواق عيسى فون سمفي كا كفرناحوم . بيلا دي ماسوق ده دالم رومه، عيسى تان صحابة ۲ دي كات: اف هق مو دوق كيچيق تغه جالن سائي؟
- 34 تافي صحابة ۲ دي مالو نق جواب، سبب دي دوق بحس سام سنديري، چارا حال اورغ مان دالم فواق دي فريگت تيغكي .
- 35 عيسى فون دودوق مياتق، فگيئل صحابة دي دوا بلس اورغ تو ماري، فس كات كا ري: جالن نق جادي اورغ فريگت تيغكي، ياءيت كنا فادول كا اورغ، بري دي كي دولو، كيت كنا دوق دفوعگوخ، جاني كولي اورغ تو.
- 36 لفس تو، عيسى امبيق سئورغ بوق باوا ماري، بري دي برديري دتغه فواق صحابة تو. فس عيسى فلوق بوق تو دغن كات
- 37 كا صحابة ۲ دي: كالو سياف سمبوت اورغ رنده سروف بوق ني، كران اكو، سروف سمبوت اكو ده، فس سياف سمبوت اكو، سروف سمبوت ده توهن هق سوروه اكو ماري.

### تندا اورغ هق دوق سبله عيسى

- 38 يحيا رويت كا عيسى: توان گورو، كيت تمو سئورغ، دوق همبت هنتو توبيت دغن فاكي نام توان. تافي كيت لارغ دي

- سوروه برادو سبب دي تاء جايي فواق كيت.
- 39 عيسى فون كات: جاغن مو لارغله! کران اورغ هق بوليه بوات فرکارا فلیق دغن فاكي نام کو، تنتوله بوکن کات سبنتر لاگي اورغ تو نق مغهودوه کا اکو، نق!
- 40 اورغ مان هق تاء لاون کیت، تنتو دي دوق سبله کیت. فس
- 41 ایغتله! کالو سیاف بري ماکن ایر کغد مو، دغن کران مو جادي میلیق اکو، اورغ تو تنتو نق بالس باءیک.

### عيسى نق بري مرید ۲ دي تاکوت کا دوسا

- 42 فس عيسى کات لاگي: کالو ار سیاف بري اورغ فريغکت رنده سروف بودق ساءني، فالیغ تاء سير فرچاي کا اکو، نق تروق لاگي اتس اورغ تو، فد اورغ امبيق باتو کیسر بسر، ایکت رتقک دي، کي تاهوق دالم لاءوت.
- 43 سابیت توله، عيسى کات، کالو تاغن مو بوات بري مو هاله
- 44 کا دوسا، کرت تاهوق فد توبوه مو! باءیک مو نق ماسوق هیدوف یغ ککل کودوغ تاغن سبله، فد مولیق تاغن کدوا، تافي کران دوسا، مو کنا تاهوق دالم افي نراک هق دوق مپالا سعمور.
- 45 فس کالو کا کي مو بوات بري مو هاله کا دوسا، کرت تاهوق فد توبوه مو. باءیک مو ماسوق هیدوف یغ ککل کودوغ کا کي سبله
- 46 فد مولیق کا کي کدوا، تافي کران دوسا، مو کنا تاهوق دالم نراک.
- 47 فس کالو مات مو بوات بري مو هاله کا دوسا، جولیق تاهوقله! باءیک مو نق ماسوق دوق دالم فرینته توهن دغن بوت مات سبله، فد مولیق کدوا، تافي کران دوسا، کنا تاهوق دالم نراک. دسیتوله، اولت ۲ نق کهور ۲ ماکن توبوه تاء فوتوس،
- 48 فس، افي فون تاء فادم سعمور.



- 49 افي ار فائده بري تاء فونه، سروف گارم بري تاء فونه .  
فس تاء ار سياف بوليه ليک افي تو .
- 50 گارم ار فائده انتوق بري بارغ تاء فونه تافي کالو گارم تو  
جاني تاور، نق بوات کان بري جادي ماسين فول ؟ فواق مو  
فون، جاغن بري فونه هق مو دوق بايک مو اکو تو، سروف  
بارغ هق بوه گارم ده، تاء فونه جوگ .

### عيسى اجر چاراحال اورغ چري

باب 10

- 1 لفس فد تو، عيسى تيغلگ تمفت تو، کي کا چغوار يهوديه  
فول، کي کا باليق سان سوغي يردن . اورغ رامي ماري برهيمفون  
سکلي لاکي، نق دغر عيسى . عيسى فون اجر دي سروف سمور .
- 2 فس، اورغ دالم فواق فريسي ماري نق بوات بوکو، بري سمفق  
کات عيسى ساله . دي فون تان عيسى : توان ، ايکوت حکوم  
تورات هق کيت، بوليه کا دق لاکي چري دغن بيني دي ؟
- 3 عيسى فون جواب دغن تان بالس ني: نبي موسی سوروه مو  
بوات بالس مان ؟
- 4 فواق تو فون کات: نبي موسی بنر بري چري، تافي کنا بوات  
سورت تولق بري کا دي .
- 5 عيسى کات کا فواق تو: سابيت مو کرس فروت، موسی لتق حکوم  
بالس تو . تافي مولا ۲، تکه توهن بري جادي مانسي، دي
- 6 کات: توهن بري جادي اورغ جنتن دغن اورغ بتينا .
- 7 سابيت نيله، عيسى کات، اورغ جنتن کنا تيغلگ ايبو باف دي،  
کي دوق سکمفوه دغن بيني دي .
- 8 فس لاکي بيني تو نق جادي سروف ساتو اورغ . کالو بالس تو،  
عيسى کات، لاکي بيني تو بوکن دوا اورغ، بق! دي دوق سروف  
ساتو اورغ . سابيت تو، هق توهن بري دوق سکمفوه، جاغن
- 9

- مائسي چري تغل !  
 10 لفس فد ري كليق كا رومه ، فواق صحابة عيسى ماري تان ري  
 11 تنتغ هق سائي . عيسى فون كات كا صحابة ٢ ري : اورغ جنتن  
 هق چري دغن بيني ري ، كي منيكا ح دغن هق لائين ، بوات زنا  
 كا بكس بيني ري تو .  
 12 بالس تو جوگ ، اورغ بتينا هق چري دغن لاي ري ، كي منيكا  
 دغن اورغ لائين ، ري فون بوات زنا كا بكس لاي ري .

### عيسى لتق تاغن اتس كفلا بودق ٢

- 13 لفس فد تو ، ار اورغ هق باوا<sup>١</sup> انق ٢ ري كي كا تمفت عيسى  
 بودوق ، نق مينتا<sup>٢</sup> عيسى سوروه لتق تاغن اتس كفلا بودق ٢ تو .  
 تافي فواق صحابة عيسى لارغ تاي بري ري ماسوق .  
 14 بيلا عيسى نمفق هق ري دوق بوات تو ، ري فون موريه كات : بلر  
 بري ري باوا<sup>١</sup> ماسوق كا اكو ! جاغن لارغ ري . كران اورغ لاكو نيله  
 هق توهن بري ماسوق دوق باوه فرينته ري .  
 15 فرهاتيله باي<sup>٢</sup> هق اكو نق رويت ني ! سياف ٢ هق تاي سير  
 سمبوت فرينته توهن سروف بودق ٢ ني ، تنتوله اورغ تو نق  
 ماسوق دوق باوه فرينته توهن تاي<sup>٢</sup> ليه ، بيلا ٢ فون .  
 16 لفس تو ، عيسى فلولق بودق ٢ تو ، لتق تاغن اتس ري ماسيغ ٢ ،  
 مينتا<sup>٢</sup> توهن تورون رحمة اتس ري .

### اورغ كاي ماري چاري عيسى

- 17 تغه عيسى دوق برجالن كي لاي ، ار سئورغ هوغل ماري  
 سبور كا ري ، فس كات : يا توان گورو هق باي<sup>٢</sup> ! امب كنا  
 بوات لاكو مان نق بري بوليه هيدوف چارا بارو هق توهن ؟  
 18 عيسى فون تان : باء اف مو كات اكو باي<sup>٢</sup> ؟ توهن سا ساج هق  
 باي<sup>٢</sup> .

- 19 مو تاهوره حڪوم ۲ توهن هق کات: جاغن بونوه اورغ، جاغن بوات زنا، جاغن چوري، جاغن کيچيق بوهوغ، جاغن تيفو منيفو، فس بري حرمتله کا ايبو باف مو.
- 20 اورغ تو فون کات: توان گورو، جق کچيک ۲ لاکي، امب تورو سموا حڪوم ۲ ني.
- 21 فس، عيسي تيغوق توجو کا اورغ تو، براس سرا کا دي، کات: ار سکارا لاکي هق مو کورغ. مو کيله، جوال هرت مو سموا، فس کي صدقه کا اورغ مسکين بري هابيس. بوات بالس تو مو نق بوليه کليق هرت دشرگ. فس ماريله، تورو اکو کي!
- 22 بيلا اورغ سائي تو دغر هق عيسي کات، موک دي کدور، فس دي تيغلگ تمفت تو دغن براس سوسه، کران هرت دي بايق.
- 23 عيسي فون فالينغ تيغوق کا صحابه ۲ دي، فس کات: تنتو فايه اورغ کاي نق سره ديري دي دوق باوه فرينته توهن.
- 24 صحابه ۲ عيسي ترکجوت دغر هق عيسي کات سائي. تافي عيسي کات تمبه لاکي: هي انق ۲ کو، تنتو فايه نق ماسوق دوق باوه فرينته توهن! کالو بندينغ، موده لاکي سئيکور اونتا
- 25 مپوروت لوبغ جاروم فد اورغ کاي جوغ سره ديري دي ماسوق دوق باوه فرينته توهن.
- 26 بيلا صحابه ۲ عيسي دغر هق عيسي کات سائي، دي فون براس حيران ساغت، فس تان سام سنديري کات: واه! کالو بالس تو، سياف نق بوليه سلامت؟
- 27 عيسي فون تيغوق کا فواق صحابه تو، کات: کالو برکنتوغ فد مائيسي، تايه جادي. تافي دغن توهن لائين. دغن ري تايه اف سکارا هق تايه بوليه جادي.
- 28 فيتروس فون کات: يا توان، فواق کيت سوده تيغلگ سموا هرت نق تورو تون.
- 29 عيسي جواب کا دي: ها سوغکوه! فس، اکو نق رویت کفد مو

- بالس ني. اورغ مان ۲ هق تيغگل رومه تغگ دي، اريق براديق جنتن بتينا اتوا ايبو باف، اتوا انق ۲، اتوا تانه دي فون، دغن کران کاسيه کا اکو، فس دغن کران خبر يغ بايک تو، فد ماس لاني، دي نق تريما لبيه فد هق دي تيغگل تو. دي نق تريما سراتوس کالي کندا، رومه ۲، اريق براديق، ايبو ۲، انق ۲ اتوا تانه، ولو دي کنا پاڻ فون. فس داخيرة فول، دي نق تريما هيديوف يغ ککل.
- 30 تافي بايق هق فريغکت تيغگي لاني، نق رنده کوء دافن. فس اورغ هق رنده لاني، نق بوليه فريغکت تيغگي کوء دافن.
- 31

### عيسى رويت کالي يغ کتيگ حال دي ماتي

- 32 فد ماس تو، فواق عيسى تغه دوق گي کا کوت جروسليم عيسى لفس گي دولو فد صحابة ۲ دي، هق دوق براس گدبر. اورغ ۲ رامي هق توروت بلاکغ فون، براس تاکوت جوگ. فس عيسى کويت سکالي لاکي صحابة ۲ دي، نق رويت حال هق نق جادي اتس دي.
- 33 دغرله! عيسى کات، لاني کيت دوق توجو کا کوت جروسليم. سمفي ديق نون، اورغ نق امبيق اکو، مائسي هق تورون د- شرگ ني، سره کا فواق امام بسر دغن گورو ۲ تورات. دوا فواق تو فون نق جاتوه حکوم بونوه اتس اکو. فس، دي نق سره اکو کا اورغ بغسا لائين فول، هق نق مئنجيغ کا اکو، لوده، فيات کو، فس گي بونوه سمفي ماتي. فس تو، دالم تيگ هاري، اکو نق هيديوف کليق سمولا.
- 34

### يعقوب دغن يحييا ماري مينتاء دغن عيسى

- 35 لفسن تو، يعقوب دغن يحييا، انو ۲ زبدي تو، ماري کا عيسى،

- کات: توان گورو، امب نق مینتاء ساتو فرکارا بري توان گورو  
 36 بوات انتوق امب! مو نق اف؟ عیسی تان.
- 37 دوا برادیق تو فون جواب: بیلا توان جادي راج، دوق اتس  
 تحتایغ مهاملیا، امب دوا برادیق نق مینتاء توان بري امب  
 دوق سکالي دغن توان، سبله کانن سئورغ، سبله کيري سئورغ.  
 38 عیسی کات کا ري: مو تاء فهم هق مو دوق مینتاء تو! مو جوغ  
 کا دق، تريما کسيقسائ سروف اکو مستي کنا تريما؟ مو  
 جوغ کا دق، تريما هق جادي پاڻ، تورون اتس مو، سروف  
 اکو کنا تريما؟
- 39 دوا برادیق تو فون جواب: ها، امب جوغ! فس عیسی کات کا  
 ري: سوغکوه مو نق تريما کسيقسائ سروف اکو، فس مو نق  
 تريما هق جادي پاڻ تورون اتس مو، سروف اکو جوغ.
- 40 تافي کواس بري اورغ دودوق، سئورغ سبله کانن، سئورغ سبله  
 کيري، بوکن کواس کو سنديري. جادي توهن هق نق بري  
 تمفت تو کا اورغ هق ري سيمفن سيف ده، نق بولييه تريما.
- 41 صحابه ۲ عیسی سفولوه اورغ لاگي تو، هاوا دغر هق يعقوب  
 دغن يحيا دوق مینتاء تو، ري فون براس نق موريه.
- 42 سابيت تو، عیسی فغکيل سموا دوا بلس اورغ تو ماسوق دکت  
 ري، فس ري کات: مو تاهو ده کات، کباپکتن راج ۲ فاکي کواس  
 اتس رعيت ري. کتوا ۲ اورغ فون، امبيق فرينته اتس فواق ري.
- 43 تافي فواق مو بوکن بلس تو. سياف ۲ نق جادي بسر، کنا  
 44 فالينغ فادول کا سموا اورغ. سياف ۲ دوق چاري فريغکت تيغکي  
 کنا فالينغ جاني کولي اورغ.
- 45 کران اکو، ماءنسي هق تورون دشرگ، ماري کا دنيا، بوکن نق  
 بري اورغ فادول کا اکو، دق! اکو ماري نق فادول کا اورغ، نق  
 سره پاوا کو، انتوق نق بري لفس پاوا بايق اورغ.

### اورغ مات بوت نام برتيميوس

- 46 فواق تو فون کي سمفي کا بندر جريکو. تغه عيسى توبيت  
فد بندر تو، دغن صحابة ۲ دي، سکالي دغن اورغ رامي، ار اورغ  
مات بوت، هق نام برتيميوس، دوق مينتاء صدقه دتغي جالن.  
47 هاوا دي دغر جادي عيسى، اورغ نصره، هق لالو کوۋ دي تو،  
دي فون مناءوغ دغن سوارا درس کات: يا عيسى، انق چوچو  
راج داءود! کسياغ بلس کا امب گاتيقي!  
48 بايق اورغ فون لارغ دي، سوروه دي دوق ديام، تافي دي  
مناءوغ کهور درس لاکي کات: يا انق چوچو راج داءود! کسياغ  
بلس کا امب گاتيقي!  
49 فس عيسى برهنتي تغه جالن کات: سوروه اورغ بوت تو ماري!  
فواق اورغ رامي فون، کي اجق اورغ بوت تو، کات کا دي:  
سنغله مو! باغون کيله، توان فغکيل!  
50 اورغ بوت فون بواغ کائين لفس، بيغکس باغون، هوغگل کي  
51 سلالو کا عيسى. فس، عيسى تان دي: مو نق مينتاء اف  
سوروه اکو بوات؟ اورغ بوت فون جواب کات: يا توان، مينتاء  
بري مات امب بوليه نمفق سروف دولو!  
52 عيسى فون سوروه دي: کليقله مو! کران مو فرچاي، مات مو  
بوليه هيلغ! فد کتيک تو جوگ، مات دي بوليه نمفق. فس  
دي فون تورووت عيسى کي سلالو.

### باب 11 عيسى بلارق ماسوق دالم کوت جروسليم سروف راج

- 1 بيلا فواق اورغ رامي تو دکت نق سمفي کا کوت جروسليم،  
دي جمبا کا کمفوغ بيت فاکي دغن کمفوغ بيت عني، دبوکيت  
زيتون، دولو. عيسى فون سوروه صحابة دي دوا اورغ، دغن  
2 فسن کا دي کات: مو کيله، ماسوق کا کمفوغ هق دوق هادف

- 3 تو. با ماسوق ده، مو نق تمو دغن سئيكور انق هيئر، دوق تمبت سييتو، هق اورغ تاء بياس ناءيك. كيله، اوغكي جيرت دي، باوا ماري سيني! كالوار اورغ ماري تان، كات: مو امبيق باءاف؟ مو رويته كا دي، كات: توان كيت نق فاكى سبنتر، فس تو، نق ماري هنتر كليق فول.
- 4 دوا اورغ تو فون كي ساللو، تمو دغن انق هيئر، دوق تمبت دفينتو رومه تغي جالن. دي فون اوغكي جيرت. فس اورغ هق دوق برديري دكت تو، تان دي: مو دوق اوغكي باءاف، جيرت 5 انق هيئر تو؟ صحابة فون جواب ايكوت هق عيسى فسن كا 6 دي. فس فواق تو بنر بري.
- 7 دي فون باوا انق هيئر ماري كا عيسى، امبيق جوبه ۲ دي، همفر اتس انق هيئر. لفس تو، عيسى ناءيك.
- 8 فواق اورغ رامي تو فون، بايق چابوت جوبه دي، فس همفر اتس تانه بوات جالن. اورغ لائين ۲ فون، كي كا بندغ كرت رنتيغ ۲ كايو، همفر بوات جالن جوگ.
- 9 فواق هق دوق بلارق دافن عيسى تو، سكالى دغن هق دوق بلاكغ فون، فاك تمانوغ، بلغ ۲ كات: فوجيله كا توهن! بري توهن تورون رحمة له، اتس دي هق ماري دغن كواس توهن! 10 تورون رحمتله اتس فرينته راج هق نق ماري، سروف دغن راج داءود، توء نينيق مويغ كيت دولو تو! فوجيله كا الله!
- 11 فس، عيسى ماسوق دالم كوت جروسليم، كي سمفي كا بيت المقديس. دي فاليج تيغوق كو، تو، كو، ني، تافي دكت نق كلف ده. سابيت تو، دي توبيت كامفوغ بيت عني دولو، سكالى دغن صحابة ۲ دوا بلس اورغ تو.

### عيسى حكوم كا فوهون ارا

- 12 فس ايسوق فول، تغه فواق تو دوق برجالن ماري دكمفوغ

بيت عني تو، عيسى براس لافر.

13 ني نمفق جاءوه لائي، ار سفوهون ارا، تيشوق داءون لبت.  
 ني فون توجو كوء تو، نق تاهو بواه ار كا دق. تافي بيلا  
 سمفي سيتو، نمفق داءون ساج، کران تاء سمفي فرياغ برهواه  
 لائي.

14 عيسى فون کات کا فوهون ارا: حق دهاري ني، اورغ نق امبيق  
 بواه مو تاءليه! صحابة ۲ عيسى فون دغر حق عيسى کات ساءني.

### عيسى ماسوق دالم بيت المقدس

15 بيلا فواق تو سمفي ده کا جروسليم، عيسى کي کا بيت  
 المقدس، نق همت اورغ حق دوق جوال بلي دسيتو. ني  
 باليق فرلنتغ ميجام اورغ حق توکر دويت، سکالي دغن کودا ۲  
 اورغ دوق جوال بوروغ مرفاتي، حق اورغ نق بوات قربان. ني  
 16 تاء بري اورغ باواء بارغ اف ۲ لالو کوء لواغ بيت المقدس تو.  
 17 لفس تو، عيسى دوق مغاجر اورغ رامي کات: ار رويت دالم  
 کتاب توهن کات:

رومه ني اکو نق بري جايي تمفت اورغ  
 برعنا انتوق سماو بئسا.

تافي، عيسى کات، فواق مو بري جايي تمفت منوسوف اورغ  
 فپامون!

18 فواق امام بسر دغن گورو ۲ تورات دغر خبر حق عيسى کات تو.  
 ني فون دوق فيسه چاري جالن نق بونوه عيسى. تافي، ني  
 تاکوت کا عيسى کران اورغ رامي دوق حيران سوک دغر حق  
 عيسى اجر تو.

19 با دکت متھاري نق جاتوه، عيسى دغن صحابة ۲ دي تيغگل  
 توبيت کوت جروسليم.



### عيسى مغاير چارا حال حكوم فوهون ارا تو

- 20 ايسوق فاكي، تغه فواق عيسى دوق برجالن لالو، دي نمفق فوهون ارا هق عيسى حكوم تو، كچوت كريغ سمفي كا اكر .
- 21 فيتروس فون ايغت هق جاري ده دولو، فس دي كات كا عيسى: هي توان گورو، تيغوقله فوهون ارا هق توان حكوم تو ممفوس ده!
- 22 عيسى كات كا دي: ايغته! كالو مو فرچاي كا توهن، مو نق بوليه سوروه بوكيت ني كات: باغونله، توبيت جاتوه لاءوت!
- 23 كالو مو فرچاي دغن تاء واويه، كات هق مو سوروه تو نق جايي، تنتوله نق جايي.
- 24 سبب توله، اكو روپت كغد مو، تغه مو دوق برعا مينتاء اف ۲ مو نق، فرچاياله كات مو تريما ده، فركارا تو، فس فركارا تو فون نق جايي هق مو.
- 25 فس بيلو مو دوق بريري مينتاء دعا، معافله كا اورغ هق بوات
- 26 ساله كغد مو. بالس توله، باف مو دشرگ فون، نق امفون دوسا ۲ مو.

### اورغ ماري تان عيسى: باوا تيته هق سياف؟

- 27 لفس تو، فواق عيسى سمفي ده كا كوت جروسليم سمولا فول. تغه عيسى دوق برجالن كو لواغ بيت المقديس، فواق امام بسر دغن گورو ۲ تورات، سكالپي دغن كتوا ۲ اورغ يهويي فاكت
- 28 ماري تمفت عيسى، نق تان دي كات: كواس هق مان بري مو بوليه بوات فركارا ۲ ني؟ سياف سوروه مو باوا تيته دي، بري بوليه بوات؟
- 29 عيسى جواب: اكو نق تان مو ساتو فركارا. كالو مو بوليه جواب، موليقله! اكو فون نق بري مو تاهو كات اكو باوا تيته هق

- 30 سياف . بيلا يحييا بري اورغ تريما روكون مندي بفتيزما تو، يي  
 باوا تيته سياف؟ هق توهن كه، اتوا هق مائسي؟ جواب له!  
 31 فواق ۲ تو فون فالينج بحس سام سنديري كات: ايه! كيت نق  
 كات. بالس مان ني؟ كالو كيت جواب كات: ماري درفد توهن ،  
 يي نق تان كيت: ها! باء اف مو تاء فرچاي كا يحييا؟ تافي نق  
 كات: ماري درفد مائسي، تنتو تاءليه!  
 32 يي كات بالس تو، كران يي تاكوت اورغ رامي نق موريه، سبب  
 يي سموا فرچاي فوتوس كات يحييا جاري نبي.  
 33 كران يي دوق واويه بالس تو، يي جواب كا عيسي كات:  
 تاء تاهو! فس عيسي كات: اكو فون تاء سير رويت جوگ، كات  
 اكو باوا تيته هق سياف، بوليه بوات فركارا ۲ ني.

### عبارة اورغ هق فاوه كبون جابيت

### باب 12

- 1 لفس تو عيسي رويت كا يي دغن فاكي عبارة كات:  
 اد سئورغ هق بوات كبون جابيت. يي بوبوه فاكر سكليلينج،  
 فس يي كالي لوبغ انتوق نق فره بواه جابيت، سكاللي دغن  
 بوات تمفت تيغكي انتوق نق جاگ كبون تو. لفس تو، توان  
 بري فاوه كا اورغ، فس يي سنديري تيغگل كي كا نكري اورغ.  
 2 بيلا سمفي فرياغ كوتيف بواه، توان كبون تو هنتر انق  
 كولي سئورغ، كي كا اورغ ۲ هق فاوه، سوروه امبيق بگيان بواه ۲  
 جابيت هق باليق توان.  
 3 تافي اورغ هق فاوه تو، چكاءو انق كولي تو، گودم يي، فس  
 هميت يي كليق دغن تاء باوا اف سكارا.  
 4 توان كبون فون هنتر انق كولي سئورغ لاكي، تافي فواق هق  
 فاوه تو كاتق كفلا انق كولي تو، فس بوات بري يي مالو فول.  
 5 لالو توان كبون تو هنتر انق كولي هق لائين فول، تافي فواق

- 6 هق فاوه تو، بونوه دي. فس بايق اورغ لاگي دي هنتر، ار هق کنا کورم، ار هق کنا بونوه جوگ.
- 7 توان کبون تو ار سئورغ لاگي، هق بوليه هنتر، ياءيت انق دي سنديري، هق دي کاسيه. سود سکالي، دي فون هنتر انق دي ني، دغن کات: تنتو اورغ هق فاوه تو نق حرمة کا انق کو! تافي اورغ هق فاوه تو کيچيق سام سنديري کات: نيله انق توان کبون سنديري! ماري کيت فاکت بونوه دي، فس هرت دي ني، نق جاني ميليک کيت!
- 8 فواق هق فاوه فون، چکاو انق توان کبون، بونوه دي، فس هيريت توبيت فد کبون.
- 9 فس عيسى تان: توان کبون نق بوات بالس مان کا اورغ هق فاوه تو؟ تنتو دي نق ماري بونوه فواق تو، بري فاوه کا اورغ ۲ لاءين فول.
- 10 فس عيسى کات: مو تاء بيلاس باچ که، ايات دالم کتاب هق کات:
- باتو هق توکغ رومه تاهوق کات تاء ترفاکي، جاني باتو هق لتق دتمفت مستحق سکالي دالم رومه. اينيله هق توهن بوات بري جاني، هق کيت بوليه کات موليق سکالي.
- 11
- 12 فواق کتوا اورغ ييهوي، هاوا دي دغر عبارة سائي، توبيت نق ايکت عيسى، کران دي تاهو ده کات عيسى دوق کيچيق توجو کا دي تافي دي تاکوت کا اورغ رامي. سبب تو، دي تيغل عيسى کي کو لاءين.

اورغ ماري تان عيسى چارا حال باير حاصل

- 13 لفس فد تو، فواق کتوا اورغ ييهوي هنتر اورغ دالم فواق فريسي سکالي دغن اهلي دالم فواق راج هيرو، کي نق بوات فرغکف بري عيسى کيچيق ساله.

- 14 فواق تو فون ماري کيچيک دغن عيسي کات: توان کورو، کيت تاهو ده کات توان کيچيک بتول سعمور، تاء کيرا کات اورغ سوک کا بق. کران توان تاء تيغوق فريغت اورغ، تيغوق سروف سموا، فس مفاجر سوغکوه ۲ کهندق توهن انتوق مائسي. سبب توله، توان فيکير بالس مان، کالو کيت باير حاصل کا مهاراج روم، کيت ساله حکوم توهن کا بق؟
- 15 تافي عيسي تاهو ده توجوان بيلق فواق تو، فس يي جواب: باء اف مونق فرغکف اکو؟ باوا ماري دويت فيرق سرکفيغ کا اکو! بري اکو تيغوق!
- 16 فواق تو فون باوا بري کا دي، فس عيسي تان دي فول: روف دغن نام سياف، فوکول اتس دويت ني؟ فواق تو جواب کات هق مهاراج روم، توان.
- 17 عيسي فون رويت کا دي: ها، جيلا! بايرله کا مهاراج روم هق جادي ميليق راج، فس سره کا توهن هق جادي ميليق توهن! فواق تو براس ترحيران ساغت، دغر هق عيسي کات تو.

### اورغ ماري تان چارا حال ماتي هيديوف کليق

- 18 لفس فد تو، اد اورغ دالم فواق صدوقي، ماري کا تمفت عيسي. فواق صدوقي تو جاني ساتو فواق اوکلم يهوي هق فرچاي کات اورغ ماتي تاء بگکيت هيديوف کليق فد هاري قيامه.
- 19 فواق تو کات: هي توان کورو! دالم کتاب نبي موسی کات، کالو اورغ جنتن ماتي، تيغگل بيني دي بلوم فد بوليه انق، ادیق دي تو کنا منيکاح دغن بکس بيني کاکق دي، فس کالو بوليه انق کنا کيرا سروف انق بکس لاکي هق ماتي تو.
- 20 بياس جاني اد ادیق برادیق توجوه اورغ. هق سولوغ برييني، فس يي ماتي دغن تاء بوليه انق لاکي.
- 21 ادیق يغ کدوا فون منيکاح دغن بکس بيني کاکق دي، فس

- ٢٢ تاءان نق بوليه انق جوگ، يي ماتي. فس، اديق يڻ ڪٽيڱ، جادي بالس تو جوگ، سمفي ڪا هق بوغسو فون، اديق يڻ ڪتوجوه تو، سموا منيڪاح دغن اورغ بتينا تو، فس ماتي بلاڪ، دغن تاء بوليه انق لاڳي. سود سڪالي، اورغ بتينا تو فون، ماتي.
- ٢٣ ڪيت نق تان توان، فد هاري بغڪيت نون، بيلا سموا اورغ ماتي نق هيڊوف سمولا، اورغ بتينا تو نق جادي بيني سياف؟ ڪران توجوه اورغ تو منيڪاح دغن ري بلاڪ.
- ٢٤ عيسيٰ فون جواب ڪا ري: مو سيلف فهم سوغڳوه! مو تاهوڪه، سبب اف مو سيلف؟ سبب مو تاءارتي هق اد دالم ڪتاب. ڪواس توهن فون مو تاءتاهو جوگ.
- ٢٥ ڪران بيلا اورغ ماتي بغڪيت هيڊوف ڪليق تو، ري نق جادي سروف ملائڪه ٢ دشرك، تاءبريني، تاءبرلاڪي.
- ٢٦ فس چارا حال اورغ ماتي نق بغڪيت سمولا تو، مو تاءبياس باچ ڪه، دالم ڪتاب نبي موسيٰ چارا حال هوتن ستومفوق هق دوق مپالا تغه فادغ تو؟ فس هق توهن رويت ڪا نبي موسيٰ دالم ايات تو ڪات:

اڪوله توهن هق ابراهيم، اسحاق دغن يعقوب دوق سمبه.

- ٢٧ معنلث، دپاله توهن انتوق اورغ هق هيڊوف لاڳي، بوڪن انتوق اورغ هق ماتي ده. فواق مو سباله هابيس ٢ چيڪف، عيسيٰ ڪات.

### حڪوم هق مستحق سڪالي

- ٢٨ فد ماس ري دوق سؤال جواب بالس تو، اد سئورغ ڪورو تورات دوق دغر. ري فرهاتي تيغوق ڪات عيسيٰ جواب ڪا فواق صدوڪي تو، موليق. ري فون ماري تان عيسيٰ ڪات: حڪوم مان هق مستحق سڪالي؟ عيسيٰ جواب: هق نيله هق مستحق
- ٢٩

سکالي:

دغرله فوق اسرائيل! ربّي توهن، دپاله ربّي یغ سا.  
 مو کنا کاسیهله کا ربّي توهنمو، دغن سفنوه هاتي،  
 دغن سفنوه راس، دغن سفنوه فیکیران، فس دغن  
 سفنوه کواس مو.

30

31 فس حکوم هق مستحق یغ کدوا، عیسی کات:

مو کنا کاسیه سام ۲ مائسي، سروف مو کاسیه کا ديري  
 مو سنديري.

هق لائين تار ده، نق لبیه فد هق دوا ني.

32 کورو تورات تو فون کات کا عیسی: مولیقله توان کورو! سوغکوه

هق مو کات، ربّي دپاله توهن یغ سا، توهن لائين تار ده.

33 فس، سوغکوهله مائسي کیت کنا کاسیه کا توهن دغن سفنوه

هاتي، دغن سفنوه فیکیران، فس دغن سفنوه کواس کیت. فس

کیت کنا کاسیه سام ۲ مائسي، سروف کاسیه کا ديري کیت

سنديري. دوا حکوم ني مستحق کنا تورو، لبیه فد سمبه

قریان بناتغ دغن بارغ ۲ لائين کا توهن، دتمفت قریان تو.

34 عیسی کابر کات هق کورو تورات جواب تو، کنا مولیق، فس

دي کات: لاني مو بارو سمفي کاتارا هق بري مو بولیه ماسوق

دوق دالم فرینته توهن.

لفس فد تو تار سئورغ هابوق براني نق تان اف ۲ دغن عیسی.

عیسی تان چارا حال المسيح هق توهن جنجي تو

35 تکه عیسی دوق مهاجر دالم بیت المقدیس، دي یان کات:

بالس مان بولیه کورو ۲ تورات کات: المسيح هق توهن جنجي

تو، نق جادي کتورونن راج داور؟

36 کران راج داؤد سنديري، ايکوت علمو هق روح توهن تورون کا ري، کات:

توهن رویت ده کا رتي کو کات: دودوق له دسبله کانن کو، سهيفنگ اکو، توهن، بري سترو ۲ مو دوق باوه کاکي مو بلاک.

37 راج داؤد سنديري فغکيل المسيح تو رتي، بوکن؟ کالو کيتو بالس ملن المسيح هق توهن جنجي تو بوليه جاني کتورون راج داؤد؟

عيسى بري امران ترهاف کورو ۲ تورات

38 فواق اورغ رامی سوک دغر فحاجران عيسى. فس تکه دي دوق اجر، عيسى کات: جاگ بائیک ۲ له ترهاف کورو تورات! دي سوک فاکي باجو جوبه، برجالن کي ماري دتمفت اورغ برهيمفون، نق بري اورغ تکور دي دغن حرمة. 39 دمسجيد، دي سوک فيليه تمفت موليق نق دودوق. دتمفت جاموان فون سرورف تو جوگ.

40 دي سوک تيفو داي اورغ ۲ بوجغ، نق رمفس رومه دي. فس تو دي کي بوات لولق دعا هق فنجغ، دافن اورغ. تنتو حکومن اتس فواق تو، نق تروق فد اورغ لائين.

اورغ بتينا مسکين سمبه دويت کا توهن

41 تکه عيسى دوق دکت توغ دويت دالم بيت المقدس، دي فرهاتي کا اورغ هق ماري بوبوه دويت. اد اورغ کاي بايق اورغ

42 ماري بوبوه دويت بايق. فس اد اورغ بتينا بوجغ، مسکين، ماري بوبوه دوا کفغ دويت، دوا ۲ کوفغ.

43 عيسى فون فغکيل صحابة ۲ دي ماري، کات کا ري: اکو نق رویت

44 کفد مو، اورغ بتينا مسکين ني بري بايق فد اورغ لاین ۲ تو.  
کران اورغ ۲ لاین تو بري هق لبیه کیرا بلاک ده درفد ککایان  
دي، تافي اورغ بتينا ني، مسکين گیتو لالو فون، دي بري  
هابیس، سمو هق دي اد نق سارا هیدوف.

### باب 13 عیسی رويت چارا حال بیت المقدیس نق رونتوه

1 تغه ۲ عیسی دوق توبیت دالم بیت المقدیس تو، صحابه  
دي سئورغ ماري رويت کا دي کات: تیغوقله توان گورو! باتو۲  
تمفت ۲ سینی مولیق سوغکوه!  
2 عیسی کات کا دي: مو بولیه تیغوق تمفت ۲ بسر ني بوکن ؟  
ماس دافن نق رونتوه ت۹ تیغگل سکفیغ هابوق، هق دوق  
سوسون ني، نق برتابور رات ۲ هابیس.

### کسوساهن دغن کسیقسا۹

3 تکه عیسی دوق دبوکیت زیتون هق دوق مهادف کا بیت  
المقدیس تو، صحابه دي امفت اورغ، فیتروس، یعقوب، یحیا،  
دغن اندریاس، ماري نق کیچیق دغن عیسی، دغن سپف ۲ .  
4 دي تان عیسی: توان، رویتله، بیلا فرکارا ني نق جايي ؟ فس  
تندا لاگو مان بولیه کیت تاهو کات ماس تو نق سمفي ده ؟  
5 عیسی جواب کات: مو کنا جاگ بري مولیقله! جاغن بري اورغ  
بولیه تیفو مو.  
6 بايق اورغ نق ماري لفس سا۲، فاکي نام کو، کات: اکوله دي  
هق توهن جنجي تو! فس دغن کات بالس تو، دي بولیه  
تیفو بايق اورغ .  
7 بیلا مو نق بولیه بوپی اورغ موسوه، دکت تمفت مو دودوق،  
فس دنگري جاءوه فون، نق بولیه خبر تو جوگ، مو ت۹ سه  
بیمبغله! فرکارا ۲ ني مستي کنا جايي دولو، تافي بوکن تندا۲



- 8 کات دنيا نق سود لاڳي. نڱري نق برلاون سام نڱري، ڪراڄائن فون نق برلاون سام ڪراڄائن. تانه نق برکوچق سرات دنيا، فس نق جادي ڪماراو جوڳ. فرڪاراني بنديڻ سروف دڻن اورڱ بتينا هق بارو ساڪيت نق برانق.
- 9 فواقي مو فون ڪنا جاڳ بري موليڻ. مو نق ڪنا ايڪت باواڳي ڪا سن. دمسيڊ فون، مو نق ڪنا حڪوم فيات. مو ڪنا برديري دافن ڪتوا ۲، دڻن راج ۲، ڪران اڪو، عيسيٰ ڪات، بري مو فلواڱ بوليہ رويت خبريڻ باءِ يڪ ڪا دي.
- 10 خبريڻ باءِ يڪ تو مستي ڪنا ڪي ڪوسنر ڪا اورڱ سموا بغسا دولو.
- 11 فس بيلا سمفي ماس هق اورڱ ماري ايڪت فواقي مو، باواڳي ڪا سن، مو تاءِ ڪنا بيمبڻ حال نق جواب ڪا اورڱ تو. بيلا سمفي ماس ده، مو ڪنا رويت ايڪوت هق توهن بري ڪفد مو. ڪران فرڪتائن هق مو نق سبوت تو، بوڪن هق مو سنديري، هق ماري دروح توهن.
- 12 فد ماس تو، اورڱ نق سره اديق براديڻ دي سنديري بري بونوه. اورڱ هق جادي باف فون، نق بوات سروف تو جوڳ، ڪا انق ۲ دي. اورڱ هق جادي انق فون، نق بوات تاءِ ڪنل دڻن باف دي، بري اورڱ لائين بونوه.
- 13 سموا اورڱ نق بنچي ڪفد مو ڪران اڪو، عيسيٰ ڪات، تافي سياف ۲ بوليہ اود سمفي سود، اورڱ تو نق بوليہ سلامت.

### بالا هق دهشت

- 14 فس عيسيٰ ڪات، مو نق بوليہ تيغوق بالا هق دهشت تو، دوق دتمفت هق تاءِ سوغ دي دوق. (اورڱ هق دوق باچ سورت ني ڪنا فرهاتي باءِ يڪ ۲ اف معنا هق مو دوق باچ). فد ماس مو بوليہ تيغوق بالا هق دهشت تو، سموا اورڱ هق دوق دالم نڱري يهوديه ڪنا لاري ڪي دودوق دبوڪيت.

- 15 اورغ هق دوق اتس سوتوه رومه، يي كنا تورون سلالو كي، تاء  
کنا روکي ماس كي امبيق بارغ دالم رومه.
- 16 اورغ هق دوق تغه باروه فون، تاء كنا کليق کا رومه امبيق  
باجو جوبه، كنا لاري سلالو.
- 17 فد ماس تو، نق تروق سوغکوه کا اورغ بتينا هق دوق مغندوغ  
فروت بسر، اتوا هق ار انق کچيک فون.
- 18 مينتاء دعاله کا توهن، جاغن بري كنا فرياغ سجوق. کران فد  
19 هاري تو، بالا نق تروق لبيه فد هق بياس جاي ده، جق  
دمولا ۲ توهن بري جاي دنيا، هيغک سمفي ماس لاني. فس  
تاء تمو ده ۲ بالا تروق سروف تو.
- 20 تافي توهن نق بري کورغ هاري، ماس تو. کالو يي تاء بري  
کورغ بالس تو، تنتو تاء ار سئورغ هابوق هق بوليه هيدوف.  
تافي کران يي کسياغ بلس کا ميليق هق يي فيليه، سابيت  
تو، توهن بري کورغ هاري ده.
- 21 فد ماس تو، عيسی کات، مو كنا جاگ. کالو سياف ۲ کات کا  
فواق مو: تيغوقله! نيله المسيح هق توهن جنجي تو! اتوا  
تو! ايتوله يي! جاغن فرچاياله کا اورغ هق کات بالس تو.  
22 کران نق ار اورغ هق اغکيت ديري يي کات يي المسيح، هق  
توهن جنجي تو، فس نق ار نبي ۲ هق بوهوغ جوگ. فس،  
فواق تو نق بوات فرکارا ۲ فليق جادي تندا، اچي بوليه نق  
بري بوليه تيفو ميليق هق توهن فيليه ده تو.
- 23 جاگ باء يک ۲ له، عيسی کات، اکو رويت ده فرکارا ني کفد مو،  
بلوم فد جادي لاکي.

تندام کات مائسي هق تورون دشرگ تو نق ماري فول

- 24 فس عيسی کات لاکي: لفس فد ماس کسيقسان تو، متھاري  
25 نق گلغ، بولن تاء چره. بينتغ ۲ نق جاتوه کا بومي، بينتغ ۲

- اودارا فون نق توروت جالن دي تاءليه، نق كي ايكوت سير.  
 26 باروله مائسي هق تورون دشرگ تو نق تيمبول دغن اون،  
 تورون ماري بري پات کواس دي هق بسر، دغن کمليان دي.  
 27 دي نق سوروه ملائیکه ۲ تورون کا امفت بوچو بومي، کي  
 ليثکوخ اورغ هق جادي ميليک توهن ده، بري ماري برهيمفون  
 امبيق دکاکي باليق ني، سمفي کا کاکي لاغيت باليق سان.

### فعا جران درفد فوهون ارا

- 28 فس عيسي کات فول: تيغوقله فوهون ارا، نق جادي تندا  
 انتوق فواق مو. بيلا داهن ۲ فوهون تو هيچو سگر، فس  
 داهن ۲ نق فچه فوچوق، مو تاهو ده کات دکت نق سمفي  
 فرياغ موليق.  
 29 بالس تو جوگ، بيلا مو تيغوق کجادين سائي، مونق بوليه  
 تاهو کات، مائسي هق تورون دشرگ تو دکت نق سمفي،  
 سروف دوق دفينتو ده.  
 30 ايغتله، عيسي کات، بلوم فد سماو اورغ لافيس ني ماتي هابيس  
 لاگي، فرکارا هق اکو رويت سائي نق جادي.  
 31 لاغيت دغن بومي نق هيلغ، تافي فرکتان کو نق ککل سلام ۲.

### تاءار سئورغ هق تاهو بيلا نق سمفي ماس تو

- 32 ولو کات بالس تو فون، تافي تاءار سئورغ هابوق هق  
 تاهو بيلا نق سمفي ماس هاري تو، بائیک ملائیکه ۲ دشرگ،  
 اتوا انق يغ ساتو فون، ملائينکن باف هق تاهو فرکارا ني.  
 33 جاگ بائیک ۲، دوق توغکوله، کران مو تاهو بيلا نق سمفي  
 ماس تو!  
 34 نق جادي سروف اورغ هق توبيت رومه، کي برجالن جاءوه.

- 35 ڊي تيڱل ڪولي ۲ ڊي درومه، سوروه ڊي بوات ڪڙج ماسيڻ ۲.  
فس ڊي فسن ڪا اورڱ توڱو فينتو، سوروه ڊي جاڳ باءِڪ ۲.  
فواق مو فون ڪنا جاڳ باءِڪ ۲ جوڳ، عيسيٰ ڪات، ڪران مو  
تاهو ماس مان تولن رومه نق ماري فول. بڱڪالي نق ڪليڪ  
مالم، بڱڪالي سمفي تڙهه مالم، بڱڪالي نق فڇه فجر، اتوا  
ماس متهاري ناءِڪ.  
36 ڪالو ڊي سمفي مڱجوت، جاڳن بري تمو تڪه مو دوق جنڊرا.  
اف هق اڪو فسن ڪا فواق مو ني، عيسيٰ ڪات، اڪو سوروه  
ڪا سموا مئسي جوڳ، ياءِيت جاڳ باءِڪ ۲ له!

### جالن سترو ۲ عيسيٰ نق بونوه ڊي

### باب 14

- 1 دوا هاري لاڳي، نق سمفي هاري راي فسخر، دغن هاري  
هق اورڱ فڱڪيل: ماڪن روتي تاهو بوه ايبو. فس فواق امل  
بسر دغن فواق ڪورو ۲ تورات، دوق چاري جالن نق ايگت  
عيسيٰ دغن سپف ۲ نق بونوه ڊي.  
2 فواق تو ڪات: ڪيت تاهو بوات فد هاري راي. تاڪوت اورڱ رامي  
ماري نق بوات هارو هارا.

### اورڱ بتينا چوره ميپ باءِ و اتس ڪفلا عيسيٰ

- 3 فد ماس تو، عيسيٰ دوق درومه صيمون، هق فپاڪيت بادم،  
دڪمفورڱ بيت عني. تڙهه عيسيٰ دوق ماڪن، اد سئورڱ بتينا باوا  
بڪس ڪاچ فنوه دغن ميپ باءِ و هق هرڱ مهل ساغت، هق  
بوات دغن نروستو اصلي. اورڱ بتينا تو فون اوفيه تڪي جبول  
تو، فس چوره اتس ڪفلا عيسيٰ.  
4 تافي اد اورڱ سينتو هق موريه، ڪيچيڪ سام سنڊيري ڪات:  
5 باءِف بري روڳي بالس تو؟ ڊي بوليه جوال لبيه فد دوا ريپو  
ليم راتوس، بري صدقه ڪا اورڱ ۲ مسڪين!

- بالس تو ڊي ڪيچيڻ تروق ترهائڻ اورڻ بتينا .
- 6 تافي عيسى رويت ڪا فواق ساءِ ڏي کات: بلر ڪا ڊي له! ٻاءِ اف مو  
دوق گادوه ۲ ڪا ڊي؟ اف هق ڊي بوات ڪا اڪو ڏي ٻاءِ ڪي موليڻ  
7 بلاڪ. نق صدقه ڪا اورڻ مسڪين بيلا ۲ خون بوليڻ، ڪران ڊي  
دوق سڪالي دغن مو سعمور. تافي اڪو ڏي تاءِ دوق سام مو سعمور.  
8 سڪت مان هق ڊي بوليڻ بوات، ڊي بوات. ڊي چوره ميڻ واڻي  
اتس توبوه ڪو، چادغ بري سيف دولو انتوق نق ماسوق قبور.  
9 ايغتله! دمان ۲ اورڻ ڪي برشرح خبر يڻ ٻاءِ ڪي درات ۲ دنيا،  
ڊي نق رويت حال فرڪارا هق اورڻ بتينا بوات ڏي، جاي  
فرايغائن ڪا ڊي.

### يوس ستوجو نق بوات درهاڪ ڪا عيسى

- 10 لفس فد تو، يوس اسڪريوت، سئورغ دالم فواق صحابه  
عيسى، توبيت ڪي ڪا تمفت فواق امام بسر، دغن توجوان نق  
11 سره عيسى ڪا ڊي. فواق تو سوڪ ساغت دغر هق يوس  
رويت تو، فس ڊي جنجي نق اوفه ڊي. يوس فون فيسه  
چاري فلواغ نق درهاڪ ڪا عيسى.

### عيسى ماڪن جاموان فسخر دغن صحابه ۲ ڊي

- 12 بيلا سمفي هاري مولا ۲ راي، هق اورڻ فغڪيل: ماڪن  
روتي تاءِ بوه ايبو تو، هاري هق قربان انق ڪيس، انتوق  
جاموان هاري راي فسخر، صحابه ۲ عيسى ماري تان ڊي کات:  
ڪيت نق ڪي سيمغن دمان، تمفت جاموان فسخر انتوق توان؟  
13 عيسى فون فسن ڪا دوا اورڻ صحابه ڊي کات: ڪيله ماسوق  
دالم ڪوت. دسيتوله، اورڻ جنتن هق فيڪول بويوڻ اير نق  
تمو دغن مو. مو ڪنا توروت ماسوق تمفت ڊي ماسوق، فس

- 14 مو کنا رويت کا توان رومه تو: توان گورو کيت کات: دمان  
تمفت توان گورو دغن صحابة ۲ دي نق ماکن جاموان فسخر؟
- 15 توان رومه فون نق تونجوق بري مو کليه، بيليق بسر داتس  
لوتيج رومه دي تو، هق دوق سيمفن سيف ده. مو سيمفله  
دسيتو، انتوق جاموان کيت.
- 16 صحابة دوا اورغ تو فون توبيت کي سمفي کا کوت، فس تمو  
سموا سروف هق عيسي فسن کا دي. فس دي سيمفن جاموان  
17 فسخر دسيتو. بيللا گلف ده، عيسي ماري دغن صحابة دي  
دوا بلس اورغ تو.
- 18 تغه ۲ دي دوق ماکن، عيسي کات: اکو نق رويت کفد مو، اد  
سئورغ هق دوق ماکن سکالي لاني، نق بوات درهاک کا اکو.
- 19 هاوا صحابة ۲ دي دغر بلس تو، دي بوسن هاتي ساعت، فس  
لفس سئورغ ۲ تان عيسي کات: امب دق توان، بوکن؟
- 20 عيسي فون جواب: نق جادي سئورغ دالم دوا بلس اورغ ني،  
هق دوق چيچه روتي دالم کواه سفيگن دغن اکو.
- 21 اکو مائسي هق تورون دشرک ني، تنتو کنا ماتي، ايکوت هق  
دالم کتاب دوق کات. تافي نق دهشت سوغکوه کا اورغ هق  
بوات درهاک کا اکو. بليک لاکي کا اورغ تو، کالو مق دي تاء  
برانق کا دي!

### جاموان ربي عيسي

- 22 تغه ۲ دي دوق ماکن تو، عيسي امبيق روتي، اوچف  
شکور کا توهن، لالو دي چوبيق روتي تو، بهاگي کا صحابة ۲  
دي بلغ ۲ کات: امبيقله، روتي ني، ايغت کات توبوه کو.
- 23 لفس تو عيسي امبيق چاون فول. دي مغوچف شکور کا توهن  
فس دي هولور چاون تو کا صحابة ۲ دي، بري کيلير مينوم،  
کنف ۲ اورغ.

- 24 عيسی کات: ايغتلہ کات ایر جابیت ني داره کو، هق کنا منيلیه توبیت انتوق بايق اورغ، هق نق بري تنتو فرهو بوغن توهن دغن مانسي.
- 25 اکو نق رویت کفد مو کات، امبيق دهاري ني، اکو تاء مينوم ده، ایر بواه جابیت ني، سهيڱ سمفي کا هاري اکو نق مينوم ایر جابیت هق بارو، فد ماس توهن نق بري سمفرن فرينته ري.
- 26 لفس تو، فواق عيسی پاپي ساتو لاگو فوجي کا توهن، فس تو ري توبیت کي کا بوکيت زيتون فول.

---

عيسی رویت دولو کات فيتروس نق بوات تاء ککل ري

---

- 27 عيسی فون کات کا صحابة ۲ ري: فواق مو سموا نق لاري تيغکل اکو دوق سئورغ. کران اد ايات دالم کتاب هق کات:

<p>توهن نق بونوه کمالا بيریغ ۲ فس بيریغ ۲ نق چلوري رات ۲.</p>
---

- 28 تافي، عيسی کات، بيلا اکو هيذوف کليق، اکو نق کي سمفي دولو فد مو، کا نڱري کاليل.
- 29 فيتروس فون رویت کا عيسی: هي توان گورو! کالو فواق ني تيغکل هابيس فون، تافي امب سئورغ تاء تيغکل توان!
- 30 فس عيسی کات لاڳي: ايغتلہ فيتروس! مالم ني، بلوم فد ايم برکوکوق دوا کالي، مو نق سبوت دافن اورغ تيگ کالي، کات مو تاء ککل اکو.
- 31 فيتروس فون رویت قواة فد دولو کات: ولو امب کنا ماتي سکالي دغن توان گورو فون، تافي امب تاء سبوت سکالي دافن اورغ کات امب تاء ککل دغن توان! سموا صحابة عيسی هق دوق سیتو فون کات سروف فيتروس جوگ.

عيسى برعاً رځيون نام گيتسيماني

- 32 فس فواق عيسى ګي سمفي کا تمفت هق اورغ فغګيل گيتسيماني. عيسى فون سوروه صحابه ۲ دي کات: مو دودوقله دسيني تکه اګو دوق برعاً!
- 33 لفس تو، عيسى اجق فيتروس، يعقوب دغن يحيا ګي سګالي دغن دي. عيسى فون براس سوسه هاتي دغن روک چيتا،
- 34 فس دي کات کا تيګ اورغ تو: اګو براس روک چيتا ساغت، هيغګ سمفي نق سود پاوا. مو دوق سينيله، تمن اګو!
- 35 عيسى فون هوندور ګي سيکيت لاګي، سوکور کا تانه، برعاً اچي بوليه، دي نق بري لفس درفد کسيقساڼ هق دوق هادف تو.
- 36 عيسى برعاً کات: يا باف ګو! اوه باف ګو! تاء سګارا هابوق هق باف تاءليه بوات. اګو مينتاء باف بري جاءوهله کسيقساڼ هق دوق چادغ انتوق اګو ني. تافي بواتله ايکوت کهندق باف، جاغن بوات ايکوت کهندق اګو!
- 37 لفس تو، عيسى کليق تيغوق صحابه دي تيګ اورغ تو، دوق جندرا. عيسى فون کات کا فيتروس: ايه صيمون! مو جندراکه؟ سمفي سجم فون، مو تاءليه جاګ که؟
- 38 فس عيسى کات کا تيګ اورغ تو: مو کنا برجاګ برعاله کفد توهن! جاغن بري هاله کا فرکارا ۲ هق ماري نق سوي مو. هاتي مو کهندق نق تګوه، تافي توبوه مو لمه.
- 39 عيسى فون ګي سګالي لاګي برعاً سروف دولو. لفس تو، دي
- 40 کليق کا تمفت صحابه دي، تيغوق دي دوق جندرا لاګي، نق چليق مات تاء ناءيك. فواق صحابه عيسى تو تاء فندي نق رويت اف سګارا کا عيسى.
- 41 لفس تو عيسى کليق کالي يځ کتيګ، کات کا صحابه ۲ دي:



مو دوق تیدور امبیق ریغ لاگي که؟ فادن ده. سمفي ماس هق  
اکو، مائنسي هق تورون دشرگ ني، نق کنا سره کا تاغن  
اورغ بردوسا.

42 باغون ماري کيت، هادف کوء دافن! تیغوقله، دي هق نق  
بوات درهاک کا اکو دوق دکت دغن کيت!

### عیسی کنا ایکت

43 تاءان سود عیسی کیچیق، یوس سئورغ دالم فواق  
صحابه دي دوا بلس اورغ، سمفي ده کا تمفت عیسی تو.  
دي باوا اورغ رامي ماري، هق فگغ فدغ، دغن میوکول. جادي  
فواق تو فسوروهن امام ۲ بسر، گورو ۲ تورات، دغن کتوا ۲  
اورغ بیهوي.

44 دي هق نق بوات درهاک کا عیسی تو، فسن ده کا اورغ  
رامي نق بوات تندا، کات: اورغ مان هق اکو کوچوف، اورغ  
تو جیلا دي. مو ایکت دي باوا دي ایریغ گي!

45 با یوس سمفي ده، دي تگور عیسی کات: توان گورو! لالو  
دي کوچوف عیسی.

46 فواق اورغ رامي تو فون ایکت عیسی دغن ترکم.

47 تافي اد سئورغ هق دوق سییتو، چابوت فدغ دي تاکیر سئورغ  
همب امام بسر، کنا تلیغا فوتوس.

48 فس عیسی کات کا فواق اورغ رامي تو: باءاف مو ماري ایکت  
اکو باوا فدغ دغن میوکول بلس ني، سروف اکو ني اورغ جاهت؟  
49 گنف ۲ هاري اکو دوق سکالي دغن مو، تکه اکو دوق مغاجر  
دالم بیت المقدیس. باءاف مو تاءایکت اکو سییتو؟ تافي هق  
اد تولیس ده دالم کتاب، مستي کنا جادي.

50 لفس تو، صحابه ۲ عیسی لاري هابیس، تیغگل عیسی سئورغ.

51 فس اد سئورغ مودا هق فاکی کائین ساج، هق دوق توروت

52 عيسی . فواق اورغ رامی نق ایکت بودق تو، تافي بي لاري دغن ترلوچوت کاین ۲۰.

### عيسی ماري دافن جملیس

53 لفس تو، فواق اورغ رامی بلاوا عيسی کي کا رومه امام بسر. رومه تو، فواق امام بسر، کتوا ۲ يهودي دغن کورو ۲ تورات، ماري دوق برهيمفون .

54 فيتروس توروت عيسی جاوه ۲، کي ماسوق دالم هلامن رومه امام بسر. دسيتو، بي دوق سکالي دغن فواق کتوا عسکر، بردياغ دکت افي.

55 فواق امام بسر دغن سموا فواق کرج جملیس تو، دوق چاري سقسي فادن بري بي بوليه بونوه عيسی . تافي چاري ۲ تاءتمو . 56 ار بايق اورغ ماري نائيک سقسي بوهوږ ترهاند عيسی، تافي سقسي تو تاء سروف سئورغ هابوق .

57 لفس تو، ار روا تيگ اورغ لاگي، ماري نائيک سقسي بوهوږ

58 ترهاند عيسی کات: کيت دغر ده اورغ ني، کات بي بوليه

بري رونتوه تمفت سوچي هق مائسي بوات، فس دالم تيگ

هاري بي نق بوات تمفت سوچي هق بارو، هق مائسي تاء

بوات !

59 ولو بي فاكت بالس تو فون، تافي سقسي بي تاء برلاک جوگ.

60 فس امام بسر باغون دافن سموا اورغ، اوصول عيسی کات: مو

تاليه جواب که، کا اورغ هق ادو مو ني؟

61 تافي عيسی دوق ديام، تاء جواب اف ۲. فس امام بسر اوصول

بي فول، کات: مو جاني کا دق، المسيح هق توهن جنجي تو،

انق توهن، هق سوږ کيت فوجي سعمور؟

62 عيسی فون جواب: ها جيلا! فس فواق مو سموا نق بوليه

تيغوق اکو، مائسي هق توروون دشرگ ني، دسبله کانن توهن

- هق مهاكواس تو. فس مو نق بوليه نمفق اكو، تورون ماري  
دري لاغيت دغن اون .
- 63 هاوا دغر بالس تو، امام بسر براس گرم، سويق فكاين دي،  
بلغ ۲ كات كا اورغ جمليس: كيت تاء كنا كي چاري سقسي لاءين
- 64 ده . مو دغر ده فركتان يي هق هودوه تو! مو كرت سين  
بالس مان؟ فواق جمليس تو فون سموا كرت سين كات عيسي  
ساله، كنا حكوم بونوه.
- 65 فس اد اورغ دالم فواق تو هق لوده كا عيسي، فس يي فكوف  
مات عيسي، كوچه دي، بلغ ۲ كات: رويتله! سياف هق كوچه  
مو؟ لفس تو، كتوا ۲ عسکر فون امبيق عيسي تمفر جوگ.

### فيتروس كات دي تاء كلل عيسي

- 66 فد ماس تو، فيتروس دوق دالم هلامن لاكي. فس اد سئورغ  
بتينا هق جادي كولي امام بسر، لالو كوء يي .
- 67 بيلا يي نمفق فيتروس دوق بردياغ دكت افي، دي فون تيغوق  
توجو كا فيتروس كات: مو فون جادي سفواق دغن عيسي اورغ  
نصرة تو جوگ، بوكن؟
- 68 تافي فيتروس بوات تاء كلل عيسي، كات: اكو تاء ارتي، تاء فهم  
مو كات كاف! فس يي توبييت سلالو كا كاكي ليم . تكه تو،  
ايم بركوكوق .
- 69 لفس فد تو، كولي ساءني تيغوق فيتروس فول، فس دي كات  
سكالي لاكي كا اورغ ۲ هق دوق سييتو: ها جيلا! اورغ ني  
جادي سفواق دغن دي!
- 70 تافي فيتروس بوات تاء كلل فول . لفس تو تاء لام، اورغ ۲ هق  
دوق سييتو ادو فيتروس سكالي لاكي كات: ايه! مو تاء ليه كات  
مو تاء جادي فواق دي، كران مو فون اورغ كاليل جوگ!
- 71 فس فيتروس برسومفه كات: كالو اكو بوهوگ بلرله توهن حكوم

72 ڪو! اڪو تاءُ ڪنل دغن اورغ هق مو دوق ڪات تو!  
 فد ڪتيڪ تو جوڳ، بويي ايم برڪوڪوق ڪالي يڄ ڪدوا. فس،  
 فيتروس ترايغت هق عيسيٰ ڪات دولو تو: بلوم فد ايم برڪوڪوق  
 دوا ڪالي، مونق سبوت دافن اورغ تيڳ ڪالي ڪات موءِ تاءُ ڪنل اڪو.  
 با ري ايغت هق عيسيٰ رويت تو، فيتروس ترياق هيڱڪ  
 سمفي مغيسق.

### عيسيٰ ڪنا باواءُ ڪي ڪا فيلاتوس

باب 15

- 1 فس، فاڳي ايسوق فول، فواق امام بسر فغڪيل ڪتوا ۲ اورغ  
 يهوي، ڳورو ۲ تورات، دغن سموا فواق جمليس، ماري مشورة  
 ڳدوه ۲، سيمفن نق بوات اف ۲ هق ري ڪهنڊق. فس،  
 بوه ڳاري دتاغن عيسيٰ؛ باواءُ ڪي سره ڪا فيلاتوس.
- 2 فيلاتوس فون اوصول تان عيسيٰ ڪات: مو جاني راج بڻسا  
 يهوي ڪا دق؟
- 3 فس، فواق امام بسر ادو عيسيٰ بايق فرڪارا ڪا فيلاتوس،
- 4 سهيڱڪ فيلاتوس تان عيسيٰ سڪالي لاڳي ڪات: موءِ تاءُ سير جواب  
 ڪه، ڪا ادوان فواق تو؟ تيغوقله بايق مان ري ادو مو!
- 5 تافي عيسيٰ تاءُ جواب اف سڪارا جوڳ، سهيڱڪ فيلاتوس براس  
 حيران.

### عيسيٰ ڪنا حڪوم بونوه

- 6 جادي، ڪنف ۲ ڪالي هاري راي فسحر، فيلاتوس بياس بري  
 لفس ساتو اورغ هق ڪنا ايڪت، اصل هق اورغ رامي مينتاءُ.
- 7 فد ماس تو، اد سئورغ نام برابس، ڪنا ايڪت سڪالي دغن فواق  
 لاون ڪراجائن، هق بونوه اورغ، تڪه جاني هارو هارا.
- 8 بيلا اورغ رامي ماري برهيمفون، نق مينتاءُ فيلاتوس بوات ايڪوت
- 9 عادة تو، فيلاتوس فون تان ري: مو نق بري اڪو لفس اورغ هق

جاني راج اورغ ييهوي كه؟

- 10 فيلاتوس تاهو چرف كات فواق املم بسر سره عيسى كا ري  
 11 دغن كران نځكي. تافي فواق املم بسر كي فوجوق اورغ رامي،  
 سوروه مينتاء دغن فيلاتوس بري لفس برابس.  
 12 فيلاتوس فون تان اورغ رامي تو سكالې لاکي کات: فس، مو نق  
 بري اكو بوات بالس مان كا دي هق مو فڅكيل راج بځسا  
 ييهوي تو؟  
 13 اورغ رامي فاکت مناء وځ کات: فاکو دي دکايو امفت چابځ!  
 14 فيلاتوس فون تان فول: تافي دي بوات ساله اف، بوليه نق  
 بونوه دي؟ فواق اورغ رامي فون مناء وځ کهور درس لاکي کات:  
 فاکو دي دکايو امفت چابځ!  
 15 فيلاتوس نق بري اورغ رامي برکن کا دي. سابيت تو، دي  
 لفس برابس ايکوت کهندق اورغ رامي. لفس تو، دي سوروه  
 اورغ حکوم فيات عيسى، فس سره دي کا اورغ نق امبيق کي  
 فاکو دکايو امفت چابځ.

### فواق عسکر بوات مځنجيځ کا عيسى

- 16 فواق عسکر فون باوا عيسى ماسوق دالم هلامن، ياءيت  
 هق کوت فمرينته فيلاتوس ساءني. فس دي فڅكيل سموا ساءين  
 17 دي ماري ليځکوځ عيسى. دي امبيق باجو جوبه جهيا بيرو  
 بوتير ستر بري عيسى فاکي، فس تو دي جالين مهکوت نځن  
 دوري سرکوف اتس کفلا عيسى.  
 18 فس، دي بوات لولق تابيك کا عيسى کات: برجاياله راج اورغ  
 19 ييهوي! فس دي امبيق کايو کاتق عيسى اتس کفلا، لوده  
 کا دي، فس بوات سجود کا دي.  
 20 سوده دي مځنجيځ کا عيسى تو، دي فون چابوت باجو جوبه  
 جهيا بيرو بوتير ستر تو، بوه فکايين هق عيسى سنديري.

لفس تو ، دي باوا عيسى توبيت كي فاکو رکايو امفت چايغ .

### عيسى کنا فاکو رکايو

21 تغه جالن کي تو ، دي جومفا دغن سئورغ نام صيمون ،  
 هق ماري ردارت نق ماسوق دالم کوت جروسليم . فواق  
 عسکر فون فقسا صيمون ، سوروه دي فيکول کايو امفت چايغ  
 هق عيسى .

( صيمون ني ، دي اورغ کوريني ، فق فد اسکندار دغن روفوس )

22 دي باوا عيسى کي سمفي کا ساتو تمفت هق اورغ فغکيل  
 23 کولگوتا ، معنان تمفت تغکورق . دسيتو دي امبيق اير بواه  
 جابيت هق چمفور دغن اوبت فلالي نام مور ، هولور نق بري  
 عيسى مينوم ، تافي عيسى تاء امبوه مينوم .

24 دي فون فاکو عيسى رکايو امفت چايغ ، فس تو بهاکي فکايين  
 عيسى سام فواق دي سنديري ، دغن کوچق اوندي بري تاهو  
 نق بوليه کا سياف .

25 ماس دي فاکو عيسى رکايو امفت چايغ تو ، فوکول سمبيلن

26 فاکي . نوتيس ادوان اورغ يهودي توليس کات :

اينيله راج بغسا يهودي .

27 تکه تو ، ار جوگ دوا اورغ فپامون کنا فاکو سکالي دغن عيسى ،

28 سبله کيري سئورغ ، سبله کانن سئورغ . دغن بوات بالس تو ،  
 جادي برتنغ دغن ايات دالم کتاب هق کات :

دي ترماسوق دغن فواق اورغ ساله .

29 اورغ ۲ هق دوق لالو کو ، کيليغ کفلا ماکي کا عيسى کات :

ها ! مو کات مو نق بري رونتوه تمفت سوچي هق توهن ،  
 فس دالم تيگ هاري نق بري فرديري سمولا !

- 30 مو تورونله دكاڤو امفت چابغ تو، بري سلامت ډيري مو!  
 31 بالس تو جوگ، فواق امام بسر دغن گورو تورات فون،  
 مښنجيغ كا عيسى دغن كات سام دي: اورغ لائين دي تولوغ  
 بري سلامت بوليه، تافي ډيري دي سنديري تالیه!  
 32 موليق كالو كيت بوليه تيغوق المسيح راج بښا يهودي تورون  
 دكاڤو امفت چابغ، باروله كيت نق فرچاي كا دي! فس دوا  
 اورغ هق كنا فاكو سكالپ دغن عيسى فون مښنجيغ كا دي گاتيغ.

### عيسى ماتي

- 33 فد تغه هاري، سلام تيگ جم، جايي گلف سرات نكري  
 34 تو. فس سمفي فوكول تيگ فتنغ، عيسى مناءوغ دغن سوارا  
 درس كات: الهي! الهي! لامر سبختاني! معناڻ: يا الله! يا  
 الله! باء اف مو تيغل اكو؟  
 35 فس دالم اورغ رامي هق دوق سیتو، اد اورغ دغر هق عيسى  
 سبوت تو، فس دي كات: ايه! دي دوق فغگيل نبي الياس.  
 36 فس، اد سئورغ هوغلگ كي امبيق گته سغريغ، چلوف دالم  
 اير بواه جابيت هق موره، چوچوق دكاڤو، هولور نايك كا  
 عيسى بري دي ايسف، بلغ ۲ كات: ننني تيغوق، الياس ماري  
 كا دق، امبيق دي تورون دكاڤو امفت چابغ!  
 37 لفس تو، عيسى سود پاوا، بلغ ۲ مناءوغ.  
 38 فد ماس تو، تابير هق دوق گنتوغ دالم بيت المقديس،  
 چاريق دوا، امبيق داتس سمفي كا باوه.  
 39 كتوا فواق عسکر، هق دوق بريري دافن كاڤو امفت چابغ تو  
 تيغوق بالس مان عيسى سود پاوا بلغ ۲ مناءوغ تو، فس دي  
 كات: اورغ ني سوغگوه انق توهن!  
 40 دسیتو اد سفواق اورغ بتينا، هق دوق تيغوق جاءوه ۲. دالم

فواق تو، ار مريم مقدالا سئورغ، سلومي سئورغ دغن مريم  
 مق يوسف دغن يعقوب هق اورغ گلر مودا .

41 تيگ اورغ تو بياس توروت عيسي تکه يي دوق ر نكري کاليل  
 دولو، نق تولوغ يي. فس اورغ بتينا بايق اورغ لاکي، هق  
 ماري کا کوت جروسليم سکالي دغن عيسي، دوق ار دسيټو  
 جوگ .

### اورغ تاروه مایت عيسي دالم قبور

42 لفس تو، فتح دکت نق کلف ده، سئورغ نام يوسف،  
 دکمفورغ اريمتيا، سمفي ده کا تمفت تو. يي اورغ دالم فواق  
 جمليس بغسا ييهوي،

43 اورغ هق سموا حرمة، فس دوق ننتي ماس توهن نق ماري  
 امبيق فرينته دغن سمفرن.

فد ماس تو، جاي هاري نق سيف سموا فرکارا انتوق نق  
 ماسوق هاري ميگکو. سبب تو، يوسف براني کي مهادف  
 فيلاتوس، نق مينتاء مایت عيسي.

44 فيلاتوس براس حيران دغر کات عيسي ماتي چفت بالس تو .  
 يي فون فغکيل کتوا عسکر ماري، تان يي نق تاهو، عيسي  
 ماتي لام ده که گان؟

45 بيلا سوده دغر فريحال کتوا عسکر، فيلاتوس فون بئر بري  
 کا يوسف بوليه امبيق مایت تو.

46 فس يوسف بلي کاهين فوتيه، کي امبيق مایت تورون دکايو  
 بوغکوس، کي بوبوه دالم قبور هق فاهت دبوکيت. لفس تو،  
 يي کوليغ باتو بسر ماري، نق بوات کاتوف فينتو قبور تو.

47 مريم مقدالا دغن مريم مق يوسف هق دولو تو، دوق تيغوق،  
 فس يي نمفق تمفت لتق عيسي.



## عيسى هيدوف كليق

- 1 لفس هاري ميغكو، ماسوق مالم احد، مريم مقدالا، مريم  
مق يعقوب دغن سلومي، بلي فركاكس ۲ نق لومور دمات عيسى.
- 2 فد هاري احد، فاكې ۲ فرياغ متهاري منجر نق توبيت، دي فون  
کي کا قبور.
- 3 تغه جالن دوق کي تو، دي کيچيق سام دي کات: سياف نق  
تولوغ کيت گوليغ باتو هق دوق کاتوف فينتو قبور؟
- 4 (سبب باتو تو بسر ساعت.) با سمفي، تيغوق باتو تو  
بکس اورغ گوليغ ده.
- 5 دي فون ماسوق دالم قبور، تمو دغن اورغ مودا، هق فاکي سرب  
فوتيه، دوق باليق کانن تمفت تو. فواق اورغ بتينا تو براس  
تاکوت ساعت، تافي اورغ مودا تو کات:
- 6 جاغن تاکوتله! اکو تاهو کات مو دوق چاري عيسى اورغ نصره،  
هق بونوه دکايو امفت چايغ تو. دي تاءار دسيني. توهن  
بري دي هيدوف کليق ده. تيغوقله، ني تمفت اورغ لتق دي!
- 7 لاني، مو کي بري تاهوله خبر ني کا صحابه ۲ دي، ترماسوق  
فيتروس کاتيغ، کات: عيسى کي دولو فد مو کا نکري کاليل.  
دسيتوله مو نق تمو دغن دي، بالس مان دي رويت کا فواق  
مو دولو تو!
- 8 فواق اورغ بتينا تو فون توبيت فد قبور، هوغل کي سلالو،  
کران دي کرون ساعت. تکه تو دي تاءار رويت. کا سياف ۲، سبب  
تاکوت.

## عيسى بري نمفق ديري دي کا مريم مقدالا

- 9 لفس فد عيسى ماتي هيدوف کليق تو، فاکي هاري احد،  
دي بري نمفق ديري دي مولا ۲، کا مريم مقدالا، دي هق

- عيسى بياس همبت توبيت هنتو توجه ايكور .
- 10 مريم فون كي رويت خبر كا ساءين ۲ عيسى، هق دوق ترياق،
- 11 سديه هاتي. بيلا فواق ساءين عيسى دغر هق مريم رويت،
- كات عيسى هيدوف كليق ده، فس ري سنديري فون تيغوق
- ده، فواق تو تاء فرچاي جوگ.

### عيسى بري نمفق ديري كا انق مريد ري دوا اورغ

- 12-13 لفس فد تو فول، عيسى بري نمفق ديري دي كوء لاكو لائين،
- كا انق مريد ري دوا اورغ، تکه ري كليق كا دارت. ري فون
- فاليغ كي رويت كا ساءين ۲ ري فول، تافي فواق تو تاء فرچاي
- جوگ.

### عيسى بري نمفق ديري دي كا صحابة سبلس اورغ تو

- 14 سود سكاللي، عيسى بري نمفق ديري دي صحابة ري سبلس
- اورغ تو، تکه ري دوق ماكن. عيسى فون تکه فواق تو، سبب
- ايمان ري كورغ، هاتي ري كرس، تاء سير فرچاي سقسي هق
- تيغوق عيسى هيدوف ده.
- 15 عيسى رويت كا ري: گيله سرات دنيا، كوسنر خبريغ باءيك
- كا سموا مائسي!
- 16 اورغ هق فرچاي، فس تريما روكون مندي بفتيزما، ري نق بوليه
- سلامت. تافي اورغ تاء فرچاي، ري نق كنا حكوم ر توهن.
- 17 كا اورغ هق فرچاي، اكو نق بري تندا ۲، عيسى كات. ري نق
- بوليه همبت هنتو توبيت دغن كواس كو. ري نق بوليه
- كيچيق بهاس ۲ هق ري سنديري تاء ارتي.
- 18 كالو ري فكغ اولر اتوا ماكن راچون فون، بيسا تاء لكت كا
- ري، فس ري نق بوليه لتق تاغن اتس اورغ ۲ ساكيت بري ري
- هيلغ.

### توهن اڱڪيت عيسى نايڪ ڪا شرڪ

- 19 لفس فد رڻي عيسى فسن ڪا فواق صحابة سائي، توهن  
فون اڱڪيت عيسى نايڪ ڪا شرڪ، بري دي دودوق ر تمفت  
ڪواس فنوه، باليق ڪانن توهن.
- 20 فس، صحابة ۲ عيسى کي ڪوسنر خبر يڻ بائيڪ رات ۲. رڻي  
عيسى فون ڪرڇ سڪالي دڻن دي جوڳ، تورو تندا ۲ هق  
بري تاهو ڪات خبر دي تو هق بتول سڻوتي.